

抱  
冲  
齋  
詩  
集

抱冲齋詩集卷五

長白 斌良 笠耕

版曹靖共集一

繼勇侯 德揚泰 挽詞

掃盡檣檣奏凱還潼河一捷動

天顏風喧鵞鴨宵臨渡雪壓貔貅夜斫關偉績克全三輔眾餘  
威猶懾五溪蠻傷心星履歸躔速未及重聯玉殿班

劍佩歸來

帝眷隆彤庭出入冠諸公圖麟雲閣千秋寵汗馬沙場百戰雄  
令肅猛寬才共濟師貞剿撫策兼通允宜靜鎮專戎闔遺愛常  
垂隴蜀中

歲在龍蛇失典型老成落落似晨星情殷當亡頭俱白誼感投

先大人道出西醫際贈醫書往覆病中詢病語丁甯  
安公相遇甚厚

視曰彼病深吾病緩耳

英靈天上應相遇每念遺徽

涕泗零

獵獵驚風捲旆寒  
台星夜隕古長安  
蒼生羣往思投轍

天子親臨撫綰警眼雲煙歸大壑連營組練罷諸闔豈惟西

顧勞宸慮共惜軍中少一韓

蟻賊蜂屯逼汝墳將軍指顧靖妖氛陳平計定咸陽寇秀實權

新兵之亂  
公埽除之

長劍倚天消殺氣  
高牙凌漢捲秋雲  
飄飄

大樹空垂鴉鼓角聲悲不忍聞

咏圭硯四言

玷墨可磨涅緇何惜秉正不移我心乃石

秋日得吳澗蓴書感而賦此卽以寄懷

遙傳雙鯉致纏絲無限情懷十幅箋蕭瑟琴書人久別團圓鐙  
火夢初圓觚棱路隔塵如海笠澤秋深浪拍天離思爭如流水  
遠朝朝得傍孝廉船

瞥眼風鐙感物華澹園幾度送行車春明離緒愁攀柳寒圃歸  
期正及瓜命蹇劉蕡嗟入洛倦游李賀獨還家須知菊瘦香偏  
晚莫歎吳霜點鬢鴉

總角論交誼倍親略除畦畛見天真此心相印原同調吾道多  
艱賴故人報國文章空爛漫濟時肝膽尙輪囷獨憐寂寞鴛湖  
畔短棹西風自采蘋

吳下書來問起居蒲箋啟處更愁余傷哉草長新霜墓淒絕烏  
嘯夜雨廬風木悲號孤子淚江湖珍重故人書習勤守拙存吾  
素讀禮餘閒或種蔬

三山葺齋罷也邇至龍王堂愛其泉壑幽秀因信宿焉

疊東坡岐亭韻題僧壁三首

金風送微涼體少汗漿汁翠萼嵐氣侵潛染衣袂溼吾生事多乖清景偶然得心偕野境閒足遜飛流急步入林樾深溪喧鬧鷺鳴精藍寄高岑疏鐘亂雲冪猛覩蒼松陰漸露寺門赤山僧迎客來眼碧頭髮白說偈轉颿輪漉酒脫巾幘談禪空萬象都泯歌與泣彈指去來今明月兩圓缺莫教佳日去百歲等行客一笑傾巖樽燒筍雲堂集

何年鑿蒼巖噴吐雪霜汁氣逼佛火昏涼沁僧衣溼清響淨耳根悠然中有得奇奧天所秘延賞來宜急會心偶觀魚息機停射鵬竭來方外游已逃世網羈秋色冷而豔雲染楓林赤靜對佛頭青甯顧俗眼白山靈容我懶頽然岸高幘泉壑愁我歸冷

冷穴中泣能不窮幽探遑惜展齒缺物外略形骸坐久忘是客  
舉杯發長嘯圓月中峯集

茗話喫茶禪花資泛乳汁興來題素壁袖惹苔痕溼香臺訪道  
林佳趣偶然得山靜歲月長不比逝川急坐愛講堂幽檀味熏  
鑪鴨松蓋碧陰圓宛似青油幕共說春山好桃蒸晚霞赤惜我  
來偏遲草團秋露白不逢絮黏衣正值風落幘木脫寒鴉愁果  
剝老猿泣但見亂峯橫白雲補其缺會須再來過攜榼更招客  
東風訂後期櫻廚聯雅集

寶珠洞

煙霞成痼疾時時亂清夢乘興偶攀躋煙蘿挽飛鞚石氣侵膚  
寒藤梢掠面痛西風飄我裳蹢躅若驂鳳漸入羣峯巔凌虛矗  
雲棟展足胸襟豁極目穹宇空林遙短於薺天低垂似甕眺遠

景固奇探幽意偏中巒壑隱空嵌山腹穴深洞何年鬼斧鑿欽  
崎令心恫直下瞰幽宮長風鳴瀕洞蜿蜒神龍蟠領下圓珠弄  
中閨老宿像危坐若持控螺青一髻盤雪色雙眉凍開山道行  
高供養禮殊眾更有飛流奔石竇噴乳湏勢訝銀河傾聲比殷  
雷闕雲琅偶然斷天風又吹送日暮冷猿吟境閒羣鳥哢舊聞  
括蒼山翠巘白雲薈快哉今日游清興寶伯仲

偕崧亭諸弟宿龍王堂

市寰無處滌塵襟結侶來尋支遁林攜杖偶過黃葉寺聯牀同  
宿白雲岑龍潭月印山僧偈驚嶺霜寒古佛心不識下方人定  
否萬重煙隔薛蘿深

紅葉

緗桃早謝滿山紅霜染楓林補化工朱紫休誇好顏色世閒容

易是西風

葵花

錦帔仙子謫瑤京身翦黃絁入道行玉鏡當階看有暈金盤承  
露滴無聲漫誇衛足終趨下謬託傾心善假名翠葉落時休悵  
望江樓堪引晚風輕

牽牛花

蔓裊輕颺上鬢絲黛痕翠點散枝枝泥人顏色惟些子傲我風  
光只片時弱縷巧憑修竹引秋心暗許一星知朝曦紅處繁華  
歇蜂蝶尋來惜已遲

玉簪花

翠葉離披襯幾叢瓊葩誰翦瓣玲瓏半含清露花房斂暗束輕  
雲粉氣融玉鏡臺邊看欲混石闌干外望疑空最憐插向雙鴉



鬢一朵瑤釵訝許同

鴈來紅

亂擲珊瑚錦砌遮園疑金谷舊繁華濃於水茜偏多葉豔比燕  
支不是花結契偶然隨白鴈駐顏應亦藉丹砂夕陽影裏看逾  
好懶向楓林晚住車

慧緣寺

盤旋螺磴入晴空城市煙霞隔幾重一杵鐘聲生腳底始知身  
在最高峯

秋日偕濮子耕松亭弟游法源寺訪唐李北海遺蹟過  
念經臺唐將埋骨在下因成長篇弔之

沈寥天光秋冥冥西風吹客來郊坰輭紅漸隔市聲遠綠陰忽  
露雙雲扃曲廊深殿晝寂寂桐陰一葉先秋零人稀地僻境逾

好辭蘿翠颭風泠泠尋幽弔古步予芒屨踏徧空王庭牆陰  
斷碣兀然立北海遺墨畱碑銘筆陣盤旋氣如象大力直欲驅  
雷霆徘徊神往貞觀歲雲煙瞥眼無畱停邇日流傳一千載精  
采奕奕如新硯劫火頻經字難泯石也有壽斯通靈高臺極目  
古京觀寒煙四匝埋荒町相傳高麗恣侵掠皇唐黷武煩金鉏  
可憐豺虎化猿鶴白骨亂掩苔痕青同邱誰辨狐共貉一抔相  
雜尹與邢鐘聲時警林際鳥燐火遠透煙中螢古寺魂歸或聞  
哭高原血盡還疑腥骼齒易朽名不朽枯骸常和旃檀馨元黃  
鑒戰舊沙磧鐘魚倏換新雲亭遺蹤勝地兩惆悵恍如中酒人  
初醒講堂小憩煮茗話興亡轉瞬詢丁甯白頭老衲演妙諦半  
尼手招雙睛眼前賢文翰雨中電羣雄際會風前萍後之視今  
今視昔逆旅一舍千人經同游二客頓參悟一笑共指檐端鈴

北江詩集卷五  
八  
五  
暇日偕子耕重過法源寺

一徑入雲塢雙筇叩竹扃法尊師有道寺古佛多靈松影依窗  
翠藤絲絡壁青重來已陳迹齒認虛亭

萬壽寺古松歌

阿蘭眾木何蔥蘢羣中峭拔唯長松七株相對各殊態礪柯天  
矯如蛟龍兩株薈蔚俯殿桷青人拱立空王宮積鐵輪囷走曲  
幹雙林陰覆盈千弓有時俊風起天末陸海頓訝奔濤春冷氣  
潛透暗佛火洪音遠冥和雙鐘更有四株相掩映左旋右折儼  
附庸虬枝交錯翠髯懸疑張鳳翅青蒙茸上者偃僂下者仰大  
夫揖讓真雍容其一牆角屹然立喬柯挺拔摩高穹蒼皮慘裂  
苔蘚迸木身細疊龍鱗豐千年鶴鶴坐巢頂羽毛擺脫飛毳氈  
晴天雷雨吼碧浪萬古黛色磨青銅正看側視各極妙高低顧

盼兼玲瓏魂搖目眩不暇給醜怪變幻窮天工我來盤桓神獨  
王對此豁達開心胸緬懷往昔盛游覽世代迭異襟期同或參  
禪味設茗椀亦有譙集裁詩筒風流裙屐久消歇碧油幢蓋猶  
童童遼耶金耶幾時植問之不答煙冥濛我今展玩增慨歎未  
知後我誰過從一番游歷一番老勁節不改常青蔥浮生那及  
貞木壽樹猶如此人難逢富貴無需急行樂瞥眼百世蘭膏融  
念此不覺發狂嘯林端冉冉來悲風賞心宏景詎比擬自慚奔  
走勞塵蹤安得終日倚松憩瀟灑揮塵斜支筇吁嗟乎畢宏韋  
偃手筆世不作憑誰鼓臂圖寫堅貞叢壩我驚溪之絹素掛我  
蝸舍之垣墉願祝松枝萬葉吾  
皇壽萬歲康強耄耄偕茲十八公

秋雁

西風蕭槭樹頭生遠吹涼天雁陣橫絕塞書回霜有信長門鐙  
暗月無聲高飛倒影楓江冷暝宿呼羣荻岸輕最是朱絃音乍  
歇相思遙隔水盈盈

秋晴

寥泚高空最可人蔚藍一色染初勻衫裁白袷閒開社扇翦冰  
紈遠障塵日透花光分燕影風收雲翳埽魚鱗扶筇小立磯頭  
望漲淥纔消迹未泯

秋草

平蕪極目綠萋萋寒色遙連落照低湘岸潮迴痕半斂吳宮煙  
暝望都迷三生幻夢餘螢火千里離情送馬蹏瞥眼春風吹碧  
轉羣腰依舊徧湖西

秋花

仙種河陽舊有菱露涼風淡半庭開伶俜宛似徐娘老爛漫偏  
招野蝶猜紅入楓林然暮雨冷和梧葉點蒼苔西成亦自饒生  
趣不待東風費剪裁

秋柳

萬樹垂楊冷露團長條牽恨起無端亂鴉啼處煙痕瘦一騎嘶  
過夕照殘羈客有情思白下美人無夢到朱闌襟懷宛似桓司  
馬搖落而今滿目看

秋風

長空清籟韻飄蕭端向人間助寂寥柝館扇拋寒夜永竹樓琴  
響碧天遙暗催柳換黃千縷漫捲蘆飛雪萬條遠送孤舟渺何  
處鯉魚初起欲乘潮

秋閨

寂寂房櫳落葉天  
褪紅衫倚峭風前  
寒蟲喧砌嫌長夜  
舊燕辭巢憶往年  
翦尺頻煩衣未寄  
刀環羞唱夢難圓  
如他牛女雙星會  
嬾赴蛛絲乞巧筵

冬日同人夜話和汪蘭山國博原韻

雲重陰霾釀雪天  
圍鑪叢話一鐙前  
茶甌香味濃於酒  
學舍風光矮似船  
同氣聯心蘭馥馥  
雄談驚座溜涓涓  
相將共領閒中趣  
不羨逍遙世外仙

憶昔分襟絕塞天  
何期簪盍晚堂前  
人情離合隨風絮  
歲序遷流下瀨船  
不藉糟邱消岢嶲  
聊憑詩卷答微涓  
從茲漸悟浮生理  
繡佛長齋懶學仙

日短星回歲暮天  
宵開清譙竹窗前  
韭菘愧入郇公席  
圖畫新排米氏船  
風急松濤鳴謖謖  
夜長蓮漏滴涓涓  
暫時伏蠖眞無

謂錯被人呼作散仙

晚出西郊

斜陽銜嶺半向晚薄寒侵帘影茅檐亞車聲石路沈草衰黃較淺松冷翠逾深今日歸何晚棲鴉下遠林

游尺五莊

魚標蟹棧隱菰蒲鶩鴨聲喧水北廬莫向畫師尋粉本天然繪就水村圖

菜花黃白錯平疇望斷荒煙古陌頭無限風光宜遠眺何人西

北起高樓

閩西北隅菜花甚盛惜無樓可以瞻眺

樽榼相將西郭幽山翁款曲意偏稠坐中盡是長醒客斗酒何

須與婦謀

某席間客皆不善飲而主人相勸甚殷故云

蒼松陰裏結圓庵避卻人間七不堪我亦年來思習靜未知彌



勒許同寵

鴨頭新漲碧漪漣紅藕香中泊釣船一棹未能通別港不妨乘  
興偶洄沿

水榭風亭到處開惜看展齒損莓苔草堂幽邃柴門靜無那偏  
多熱客來

飛來鳳子舞雙雙嫩藥繁枝映碧幢爲愛空亭花四照憑虛面  
面盡安窗

蠻箋屢擘韻頻拈詩興翻隨暮靄添  
漸上青帘  
烏催歸人去也夕陽紅

送畫師毛竹齋永青還毘陵

幅巾存古意言笑露天真爲乞長安米因沾京洛塵  
夢花管四時春六逸今寥落斯人足比鄰

覺生寺大鐘歌

勝國法物畱精藍有客好古窮幽探洪鐘虛懸具萬象靖難口  
實畱燕南相傳初營肇永樂頻年黷武勞丁男國殤無算化猿  
鶴招魂度彼歸瞿曇太孫嗣位太孱弱廟堂仁義侈空談令名  
未肯害叔父金川兵沸羅憂悵識符燕子高飛入夢兆龍孫野  
戰酣庇根葛藟誼早絕連鈔瓜蔓心何甘可憐孤忠灑碧血虛  
傳老佛潛茅庵成王安在論已定輔相公旦心懷慙銷兵使製  
萬石簾大錯永鑄空王龕形高三丈尺有六體重八千奇零參  
金繩鐵索貫其紐下隆上殺中潭潭蛟夔虬螭象獅鹿雷紋雲  
篆蟲魚豔流傳書蹟自沈度筆勢挺拔姿嬰娉華嚴滿藏字深  
刻利鐫削出新戈鐔生沙活翠隱凹凸苔衣蘚髮垂鬢鬢橫枌  
盈丈似寸筵叩之微聽聲鏘鏘堂哉斯鐘洵偉觀措目審視勞

**Figure 6**

爲

雨中赴西淀

鄧真與雜樹聲離園立舍歸緙此堪停

曉出西郭

涼風警殘夢旭日促征鞭豐草國清露遙林聚碧煙菜傭爭入市茶肆未開筵戶閉千家靜號鴉讓客先

重過款竹山莊有感

嘉樹童童似葢圓綠陰無恙落窗前蟬聲攪夢仍長夏駒隙催人漫九年泥換香巢新壁壘雨昏塵墨舊詩箋蠹魚空老仙難化回首匡山更惘然

甲子歲余會讀書莊上

月夜題壁

槐蔭風清送晚涼月移樹影上空廊分明一幅沒骨畫素女時時勤換將

題畫梅扇頭和党篴橋韻

回首湖山歲幾更寬鞦瘦策記閒行幽姿妙在無人賞萬樹寒

香趁月明

晚出西直門

出郭亦何晚石橋空靄橫前程憑馬足舊感寄蟬聲樹遠蒼煙起風輕細浪生夕陽留暮景冉冉上衣明

題樂壽軒示兒子延福

鐙火虛窗守一經兒時猶記此研精檐頭喬木猶清蔭屋角雛童換舊聲但啟屯蒙更氣質敢求聞達顯科名賜書插架須勤讀莫效而翁學未成

談禪八詠

生

試問先天若賦形哲人恐亦未分明大千世界還添我十二因緣頓發萌鼎食繡衣恣奉養梅妻鶴子動關情相將寂滅誰參

證大地從教眾輔成

老

朱顏頓改舊風流駒隙恩恩逝莫留世事飽諳傷冷暖人情歷  
徧自陽秋慣牽清興花生眼催去韶華雪滿頭寄語兒童莫調  
笑此閒路逕總來游

病

無端神體失陰陽瘦骨嶮嶮靜拊牀偃蹇三尸疏衛養纏綿二  
豎隱膏肓心安卽是籠中藥肱折難求世外方焉得救時真國  
手恫瘝民瘼等身膏

死

露電珠泡頃刻中霎時撒手返虛空精靈不泯留人表厲氣難  
消亦鬼雄賸有皮囊成臭腐僅多眼淚累兒童此中苦惱終須

歷稔種朝花雨不同

胎

胚胎萬變巧安排第一真源孕孰懷性命本來歸太極妍媸從此判形骸蚌迎秋月珠方吐鶴產青山羽乍揩血肉介鱗區別迴須知胞與盡同儕

卵

太古誰開混沌天彈丸微具小坤乾羽毛未化文章蘊黃白無分氣體全巢處常危緣渾脫歷來易破欠剛堅何如有美中通理威鳳慈烏任變遷

溼

潛蒸二氣結氤緇爾羣生戴甲鱗野馬遠飛堦下影醯雞暗釀寶頭春小窗偶伏蟬蛉子大地無非蟣蝨臣卑下任他羣醜

處蟄中尺蠖敢求伸

化

造物裁成鮮定形  
竟將芻狗玩羣靈  
深林羽翼空山角  
風裏楊花水上萍  
蟬退已非前度迹  
螢飛仍作舊時青  
循環倚伏生還滅  
法界金輪轉不停

秋海棠

弱質娉婷半掩羞  
胭脂些點倍風流  
夕陽牆角傳芳影  
涼雨簾櫳泥客愁  
鵲血暗凝花上淚  
蛩聲低喚葉邊秋  
睡情無復酣春態  
腸斷東風秉燭游

雨中出西直門寫望

潑墨林巒畫未收  
溟濛雨氣四郊浮  
漲添綠漸移沙  
觜雲溼青看壓樹頭  
世路頻年隨馬足  
天涯何處著漁舟  
思量欲逐閒鷗



去囊笠同盟野挾秋

秋日閒居用高季迪韻

蒼翠陰中小結廬  
消磨只藉半牀書  
境閒鳥暗窺吟嘯  
性拙人稀問起居  
槐騎庭柯經雨密  
竹依籬落受風疏  
十弓間地三間屋  
意興蕭然自有餘

敢擬南陽諸葛廬  
愛攀叔夜絕交書  
詩成每盼良朋政  
屋曠宜招遠客居  
花影淡描神轉豔  
秋光濃處樹尤疏  
苦吟好景終難就  
愧向前賢拾緒餘

咏菊

英含金色人多賞  
名藉高賢品更奇  
能耐秋風留晚節  
人閒的是好花枝

自歎

忽漫鬚髯似戟張壯夫歲月去堂堂本非上智難無惑纔到中年已健忘製錦幾曾傷美學佩章幸少減剛腸可能養就汪洋度舒嘯閒雲意興長

題聽雨樓

燕地從來少建樓數椽結構轉清幽寒山一角有遠勢疏柳幾株無限秋蠻榼提攜剛雨過胡牀吟嘯亦風流元龍百尺尋常事此意吾曹喻未不

自吟

聖俞日課一編詩深致吾時欲效之點綴鶯花成故事吐吞雲夢作新詞滿毫揮就思嫌直擊鉢催殘詠恐遲安得吟成如劍器渾融圓脫愜心期

中秋

涼蟾二十九番懸歲歲情懷任變遷千里應同今夕好一生能  
共幾回圓綺筵綵錯陳瓜果桂院聲飛沸管絃知否明年何處  
賞且傾銀鑿醉花前

中秋日游極樂寺

去年八月中秋日匯通祠畔閒相羊今年忽忽又秋半復詣野  
寺尋秋芳輕裝小隊出西郭荻蘆蕭瑟商飈涼澄波如鏡望不  
極秋水那如秋思長水楊淡沱帶寒照殘荷披拂凋清霜橋迴  
路轉蘭若見柴荆遠帶西山蒼入門微笑悟禪悅雜花扶屐升  
虛堂芳菲紅紫燦蜀錦畦畛碁布井畫疆倚闌望去出無路有  
亭四照居中央想像已公始結構盡窺天奧勞端相我來排悶  
展遐矚眼界頓豁神飛揚地偏時見鳥出沒牆短遠露峯低昂  
千章灌木綠無縫目窮四野青茫茫山僧畱我暫瀟灑同參玉

版炊黃粱自言野外供給鮮盤羅蔬筍無酒漿瓦壺初瀹日鑄  
嫩瓷甌擎出伊蒲香齋餘單挂洗鉢訖曲廊深殿隨徜徉僧雛  
招客賞花塢老鶴導人開竹房紗鐙一點古佛定白雲幾葉風  
旛颺對之不覺滌塵慮欲登寶筏超津梁話來晝暖日將夕烏  
駝漸欲沈扶桑遠公約我信宿住共看明月升前岡爲言此地  
風景好野曠月色空無妨金波直瀉光潋灩中庭疑浸水一方  
竹柏影橫荷藻亂松杉枝走虬龍翔何須繭縛入城市朱樓甲  
第多周防我聞是語莞爾笑法師無乃多魔障了無罣礙老佛  
諦大千粒粟須彌藏塵境超脫在心境刻舟求劍真癡盲緣思  
今夕玉盤皎千里共仰清輝光世無賢愚競玩賞其間變象那  
可量或有叢臺夜開譙銀蟾影裏飛霞觴綺筵綵錯瓜果列畫  
堂鼎沸絃管張亦有襍被罔羈旅天涯顧影增悲傷幾番翹首

望都邑倏爾低頭懷故鄉十年思婦閉金屋萬里孤臣謫夜郎  
幽人壺中濯冰魄壯士劍底生雄芒高寒香散動玉宇冰霜痕  
碾迷沙場人歌人哭月不管月圓月缺人空望苦甘雖異照則  
普月固無言人自忙百年世事等棊局萬古此月懸如常靈臺  
透關通眾理玉堂茆屋俱相忘清容圓滿隨處好詎論兩地分  
參商偶緣感觸演小乘參寥漫說涪翁狂法師聽罷微領首無  
言妙諦誰能詳殷然叩我再來日笑指籬邊野菊黃

游拈花寺

訪勝閒尋物外蹤精藍幽虛石橋通湖光近接分晴綠樹影周  
遮隔輭紅竹院晚鐘秋境界蒲團夜火佛家風拈花妙諦師參  
未五濁從來十地同

秋日偕象思齋農部 曾游極樂寺

蘭若尋秋又一回  
荆扉款處興悠哉  
誰知鹿苑聯翩客  
卻自鸞坡拜舞來  
楓樹正宜霜夕賞  
菊花似待瘦詩開  
因緣自笑狂如葉  
飛下清虛傍講臺

遠公畱客具盤餐  
几席排來十笏寬  
蔬筍氣含僧淡泊  
琉璃光照佛荒寒  
心空練影澄波淨  
足踏秋聲落葉乾  
我輩勝遊須記取  
中庭霜柿已題殘

秋日泛舟二牖

激灩晴波頓豁眸  
西風涼動一襟秋  
蒼葭晚翠藏漁渚  
疏柳寒煙認酒樓  
薄宦終年慚走馬  
閒情此際暫盟鷗  
蜻蜓買得聊乘興  
也抵茗溪片刻游

韻華館遺懷

簾額重遮室易曛  
水沈香散半爲雲  
風聲在樹高逾響  
花氣撩

人靜始聞小閣琴書勤拂拭長安車馬任紛紜孤芳清瘦欣多  
遇寒月虛窗我伴君

雨中竹韻齋偶成

涼雲罨屋晝常陰引起淒清此際心小雨作寒催節換晚芳畱  
豔慰秋深栗皴乍擘黃盈殼桑落新籊綠待斟每近重陽晴日  
少瘦筇無計愜幽尋

小園閒步

小關町畦十畝寬晚耘堪摘佐盤餐清波徐引秋塍潤涼翠低  
連夕照寒偶值園丁課晴雨願教稚子識艱難閉門種菜非深  
隱差勝英雄老據鞍

題党遂橋畫菊

葉飛亂敲紙窗薄無處尋秋甘寂寞打門示我菊花圖活見秋

容腕初脫竭來高張素壁東蕭條一幃生西風花嬌似著新霜  
膩葉碧疑團冷露濃不寫軍持斜插勢資甌瓦鉢几三事磬石  
苔錢襯幾叢孤芳小草添幽致由來作繪難得神先生染翰妙  
絕倫不攀粉本師造物一葉一花俱是真我知毫素因天巧胸  
次無塵筆端矯花逸偏憐性逸人圖中宛若籬邊好濡毫寫就  
一枝枝遮莫因之動去思傍花村裏斜陽路酒熟螯肥正待持

秋日出阜城門過衍法寺

茸帽絲鞭趁意行閒尋蕭寺訪題名秋深野水全歸壑天淨羣  
峯半入城寒氣釀成霜樹色韶華催去暮鐘聲石橋送別歸逢  
雨燒筍僧窗憶昔情

秋寺

精藍蕭瑟結峯頭老衲寒雲守一邱法相光分千澗月孤鐘涼



動四山秋木犀香透禪心靜柿葉題殘瘦句畱聞道菩提空眾  
象可能蕩滌此時愁

秋日偕蘭山汪九游釣魚臺

桃葉渡西子湖笙歌畫舫燕南無悠然忽動濠濮想聯翩走馬  
遵修途誰開明鏡城西隅包含地脈縈川涂清溪潄潄浩無極  
溯源何自淀與沽湖光一片透林隙直訝萬頃琉璃鋪楸頭漾  
處藹嵐翠岸尾迴際生菰蒲閒鷗出沒等飛鶻老魚驚鼠如奔  
狐長隄似帶繚而曲綠楊搖曳秋風疏橋迴路轉眼忽礙釣臺  
突兀凌空孤垂綸豈是任公徒釣竿斜拂青珊瑚相傳基是蔡  
氏圃邇來已向官家輸瀛洲上苑禁觀眺可望難卽如方壺  
宸游宴豫賦魚藻想像劍履雲霞趨檐牙高臨飛鳥革石牕橫  
鎖排籠簌白板束水水流急怒馬馳驟矢脫弧清音亂壑寒漱

玉冰簾倒捲輕跳珠。褰裳行過石牕口。魂驚目駭疑乘桴。沿河  
無那太平遠。陟彼高阜枝藤扶。部婁之顛盪胸臆。輕颺涼漸侵  
肌膚。白雲在天似可呼。風泉清籟笙竽如。飄然但恐欲飛去。西  
風獵獵吹襟裾。行行力倦思小憩。青帘招客相嬉娛。詎知茆店  
鮮烹割。鹽豉漫下雙鰕鱸。十錢一壺濁酒沽。餽飫油膩寒具麤。  
餅師叉手權當爐。蒼頭解橐揮青蚨。欲吟長句壞壁書。袖痕恐  
被煙痕污。毛錐借問田間夫。敲斜淡墨驚鴉塗。莫嫌野外景寂  
枯。風趣恰與塵中殊。游興未闌日及晡。墟煙冉冉生平蕪。眾鳥  
各下。將其雛。昏鴉歷亂鳥畢逋。炊煙暮靄相縈紆。漁莊蟹舍看  
模糊。分明一幅輞川圖。天開粉本誰能摹。

題和容圃山水畫障歌

煙霞孤僻情所鍾。鍾情空引勝。尋芳蹤。清游林壑愛如畫。評畫

要與真相同遂令畫師費摹擬意匠慘淡丹青中十日一水五  
日一石渲雲潑墨紛無窮平生自笑少清福輒紅塵裏奔花驄分  
無撐杖倚蒼翠虛堂展畫看穹窿芙蓉幾朵插梁棟逸氣飛越  
摩晴空此圖點綴得生趣長林蔚蔭溪冥濛茅檐寂靜似無客  
高松盤屈疑搖風疏籬掩映遠峯碧深澗躑躅山花紅有時眼  
界忽開朗飛流倒瀉潛蛟宮幽人俯仰慕幽景瓜皮自盪飄秋  
篷不載琴書載孤鶴一舟相伴如奚童忽然長嘯水雲破鶴鳴  
相答聲和融悠哉此樂果何極清興輟與避世翁我今執版趨  
瑣闥那容拄笏尋崆峒須知天游等親歷無事徧躡青玲瓏望  
中梅實渴能止畫來餅餌飢堪充茲緣讀畫悟禪理境之所隔  
以意通濡毫題罷問容圃未識此論公不公

癸酉元旦

闐闐千門傍曉開一聲爆竹兩年催殷紅貼寫新正首綠萼梅  
爭眾卉魁餞臘臘從何處去迎春春向那邊回癡獸昨夜聽人  
賣我乞諸公獨買來

### 悼亡

跬步相將十四年何期遽反大羅天千方藥裏醫無效中道琴  
絃絕可憐炊臼夢魂驚化蝶落花心事屬嗁鵲早知竟夕分飛  
去悔不親開初度筵

今春爲亡內  
三十初度

井曰親操歷苦辛誥章他日擬榮身那知未享生前福遽爾  
驚爲地下人失恃鳳雛誰鞠育長開魚目獨逡巡待營齋奠知  
何日一挂遺徽倍愴神

蘭折春閨總淚漣慈祥宜眾感幽閒纏絲恩澤畱傭媪零落衣  
裳施小鬢屏風涼雲迷鬢霧鏡空煖翠隱眉山暮看遺挂依殘

壁彷彿歸甯尙未還

有感六絕

蜂窠蛛網羅空廊簾額凝塵白似霜  
天氣乍涼人寂寞單棲風味斷柔腸

約略形容小影張一卮佳醕酌秋堂  
兒童畫裏猶相識指點齊聲喚阿娘

記得尋秋靜夜還紅鐙窗際對眉山  
何期遽失驚鴻影涼露西風小院閒

依然瓜果錦開筵不聽因風笑語傳  
瓊珮聲沈良夜杳情懷輸與月輪圓

連袂飛觴醉玉盤此生能共幾團圓  
樂偶裁小句真成讖今歲蟾

光賸獨看

去年中秋句有此生能共幾回圓之語竟成詩讖

涼沁珠簾夜氣幽木犀香動又新秋不知天上清虛地可似人間爾許愁

無題三首

塵封寶瑟頓淒涼回憶風徽幸未忘孔雀東南飛忽杳牽牛西北坐相望繡奩偶拾描殘譜妝盒猶餘熱賸香舊物怕看休更理泥人情思斷人腸

落紅一夕訝春空碧海青天隔幾重執袂幾時畱芍藥褰裳何處采芙蓉疏燈窗戶飄殘夢斜月簾櫳度曉鐘聞說瓊華歸闋苑玉虛豈易得相逢

人間別樣有閒愁欲撇無因莫自由花榭枉拋紅燭淚雨窗深鎖碧梧秋鈿遺翠想依雲膩環褪金思繞指柔一去藥珠宮闕迴不知曾也憶儂不

夏日遣懷

瑣窗依舊護紗紋，荏苒清和節序分。  
倦枕偶拈常似夢，風簾自動卻疑人。  
塵凝寶鏡迷鸞影，衣別香篝惹麝熏。  
懊惱杏梁雙燕子，無端相對話殷勤。

晚出西直門寫望

纔聽昏鐘度女牆，高城回望轉蒼茫。  
煙中犬吠村逾靜，波外鷗眠夢最涼。  
蕭寺月明僧共語，茅檐茶熟客分嘗。  
詎知冠蓋朝天路，忽引田園野興長。

暇過竹韻齋

廢學今已久，坐來成永歎。  
硯枯鸛眼澀，書捲蠹魚乾。  
濁酒憑誰送，閒花賸自看。  
蟬聲又催晚，簾影夕陽殘。

偶成

舊恨新愁共惘然綠陰無恙落窗前一株高柳縈情思旣送斜陽又帶蟬

綠蘿山莊閒詠

自向銀牀汲井華中庭灑掃浥輕沙救時空憶爲霖手小試餘波潤一家

薔騎庭柯似蓋圓打頭屋矮築三椽坐來共話清陰美誰記村翁種樹年

曲曲朱欄面淥波滿陂紅藥殿春和客過漫道風光麗培植工夫費幾多

濃陰圍住小窗間無那西牆隱髻鬟准擬高樓雲外結靜聽春雨飽看山

夏日雜興



向晚收殘暑匡居引興長縱橫揮麈倦槃礴解衣狂林密遲生  
月荷疏遠放香呼童移短榻消受北窗涼  
冰簟清於水珠簾后似波襟期閒若此風趣近如何櫻筍廚仍  
設茶瓜客漫過閉門無剝啄晞髮自高歌  
永晝慵攤飯藤輪小睡便蠅喧眼前法蝶幻夢中天養拙翻成  
福無言卻似禪黃甯隨處得笑事守丹鉛

雨後過極樂寺

好雨動游興言尋選佛場茶煙裊空翠花氣遞幽香石逼泉流  
細窗含檜影涼僧分齋鉢飯湖畔祀魚王

雨村晚歸

初月乍生樹夕陽猶在山步隨流水遠心共晚風閒釣客收綸  
去村童刈麥還蟬聲對鷗立語默不相關

秋日偕吳澗萼游天甯寺五十韻

梵刹

皇都峙浮圖碧落懸孤標森近遠砥柱共流連畫角層

層湧朱闌面面旋牟尼光四照鈴鐸語三千周覽頻思古虛空

不離禪規模超魏晉形勢鎮幽燕代謝畱遺蹟人來結靜緣入

門同一笑趺坐問誰先竹院僧如鶴松陰客似仙風疏黃葉外

秋老白雲邊天闊初迴雁林寒尙咽蟬鐘魚啟岑寂輪轍絕喧

闐弔古襟懷廓尋幽足力便丹青看黯黯庭宇步繇延緬彼開

皇始堂哉締造年陳家移鼎祚隋氏握坤乾統合輿圖盛民殷

梵教宣南郊開寶象左藏散金錢毀像形廷禁刊經紫府權莊

嚴羅七寶那刹列諸天紺塔玲瓏起豐碑次第鐫蛟螭蟠錦砌

獅吼刻文甃陡絕周無外居中勢不偏豈徒通漢表直欲逼星

躔浩劫塵中盡閒雲物外遷遼金多閱歷唐宋遞循沿怖鴿棲

龕頂潛狐走廟堧崇墉蒼蘚蝕壞壁亂藤纏勝國基初創祇園  
勢獨騫談兵禪室畔倚馬法輪前上相謀猷失宗師武略專廟  
堂疏駕馭藩服奮戈鋌變亂徵朝激軍聲靖難傳酷傷爪蔓戮  
威過豆萁煎王弱綱難振臣忠命枉捐妖星騰玉闕殺氣滿金  
川賈勇誠雄也捫胸豈坦然護持推佛力懺悔託真詮一代論  
功罪千秋定簡編雄豪歸想像勲業渺雲煙賸有危幃聳空悲  
宿草芊朐歡神灑落野老語纏綿趣自閒中得情偏世外牽談  
經花下榻洗鉢竹閒泉豆火房頭暗茶煙屋角穿雲堂良潔淨  
老圃更澄鮮紅坼安榴綻黃苞小菊圓樹敲防掠帽籬短卻隨  
肩到此吟懷放來游俗慮蠲金輪銜夕照緩緩著歸鞭

同懷弟法良校刊

男崇福謹校重刊

抱冲齋詩集卷六

長白 斌良 笠耕

滑邑從戎集一

過南樂縣

滿地兵戈沸巖城早閉門黍禾垂斷隴煙火絕孤村白骨沈沙  
冷青燐入夜昏憑誰託生計牢落問乾坤

夜宿開州軍營和錢質夫農部

學彬韻

征袍乍卸動塵埃橐筆誰爲倚馬才天末枕戈鄉夢遠帳前磨  
盾羽書催軍聲早共山河壯愁緒還隨鼓角來極目長沙星影  
動豹韜空向一鐙開

開州軍營感懷卽事

雄藩百戰古澶淵偶駐行旌意惘然盟約金縢悲往事郊生戎

馬感茲年抽毫飛草三更檄蓐食爭炊萬竈煙天際櫓槍無術  
掃幾回腰下撫龍泉

無端橐筆學從軍回首家山隔暮雲閭外風霜嗟乍歷賊中消  
息半傳聞鼓鼙送客來天末鐙火圍人語夜分千里觚棱重回  
首北山且莫勒移文

雙旗飄颺立營門令肅貔貅上將尊礮火攻城煙作陣寶刀殺  
賊血無痕殘骸烏啄驚人目破屋鴟蹲愴客魂滿地瘡痍皆赤  
子腳踏無計靖乾坤

三十功名志願殊珥貂莫漫誑頭顱借籌帷珠鈴密轉戰疆  
場白骨枯後勁徒聞嚴虎旅先登誰早拔螯弧孤城斗大游魂  
聚誓掃封狼絕蔓株

敢冀奇勲勒鼎銘平生壯觀歎初經驚沙幕捲晴天雪遙夜鐙

搖陸海星倉卒師行頭欲白艱難友共眼偏青洗兵倒挽銀河  
水齊唱刀環數驛亭

鼎盛金甌正可爲稱戈衽席事堪悲寶融拜表心原切楊僕朝  
天願莫追右輔河山勞上相北門鎖鑰鎮偏師平吳入蔡諸公  
分漫勒淮西百尺碑

營中偶成

戈殳林裏獨長征旁午軍書夜繼明天假片時間不易地鑪炊  
茗作松聲

郭村軍營冬夜感懷

鈴柝聲隨霜氣沈枕戈假寐薄寒侵纔離劫海風難靜未破愁  
城夜共深羃幕紅鐙鄉國夢萱堂白髮別離心刀環待唱知何  
日落月嘒烏憶故林

軍中寄家書

京華千里鎮相望  
草草家書寄數行  
寫到艱危還閣筆  
平安聊說慰高堂

冬夜孤坐感成

短檠明滅影蒼涼  
刁斗聲嚴夜未央  
京邸無書通古驛  
家山入夢戀高堂  
棄繻從事心原壯  
彈鋏思歸願未償  
藩觸紙羊終少據  
幾回搔首意徬徨

郭村寫望

殘陽曖曖下孤村  
驕客來過欲斷魂  
遠樹參差煙霧隱  
歸鴉何處認巢痕

開州軍營與吳蓼庵大令話舊感成

一別觚棱倏幾春  
桃花潭水憶汪倫  
那期戎馬交馳地  
卻對風

塵落拓人甲帳倚弓聯舊侶蕭齋同研記前因亡羊得馬尋常事且倒清樽醉數巡

燕南終歲悵淹留投筆無端作壯游漫說行軍司馬智獨憐羈客仲宣愁崎嶇世路誰青眼潦倒名場漸白頭堪笑河陽復從事鴛湖煙水滯歸舟

由開州前赴滑城路出潘漳四閒房桃園各村皆被賊蹂躪不堪寓目感成此什

驚沙禿樹黯孤村風物荒涼愴客魂比屋焚餘垣壁赭積骸消盡髑髏存更無野老吞聲哭賸有陰燐入夜昏好奠蒼生登衽席早紓

宵旰達

天闕



由滑縣振旅還京路經濬縣感賦

鄰邑烽煙三月昏  
鯨鯢纔掃釜中魂  
森嚴軍令過無擾  
喪亂輿情定後論  
野鶴時嘯殘壁壘  
哀鴻未返舊巢痕  
雄城無恙臨清濬  
父老壺漿出遠村

十二月十六日泥溝驛凱旋喜成

馬逐風塵露布傳  
凱旋高唱整歸鞭  
猶驚羽檄催戎幕  
應喜貔貅靖燧煙  
京國音書遲一月  
異鄉景物逼殘年  
遙知此夕高堂話  
早計同開薦臘筵

過沙河縣

孤城斗大倚雲黃  
零落人煙冷夕陽  
下澤車來皆四轂  
荒村民住半低房  
黏天沙湧埋青草  
夾道風悲老白楊  
此邑兵戈未殘破  
如何景物亦蒼涼

漳河懷古

曠世英名安在哉興亡同盡事增哀  
東京詞賦畱餘勁北戒河山老霸才  
終古金鳬迷葬地當年銅爵有高臺  
驅車試問清漳水曾照羣英奪錦來

磁州

路出燕南古驛賒鞭絲低逐野風斜  
蒼葭汀遠寒棲露疏柳煙昏晚帶鴉  
流水聲中人似夢青山影裏客思家  
惜無官長如靈運清景憑誰麗句誇

柏鄉遇雪感成

天公憐我獨長征故遣瓊瑤作化城  
漫指寒雲同一色好將歧路認分明  
酒邊村落青帘影夢裏關山玉笛情  
最是一鞭歸騎穩輦紅溼處踏無聲

風帽衝寒歎遠征東皇翦水壓荒城瓊樓天上人難到銀海光  
中眼漸明煮處禪應通茗味地近趙州故云嚼來清欲沁詩情他時好  
向西齋宿臥聽虛檐折竹聲

過趙州

綠楊夾道暮煙籠傑閣翬翔矗碧空古邑名偏畱夏日飛橋勢  
欲倚晴虹試茶竹寺皆禪境炊黍茅檐似夢中路遠馬蹇停轡  
晚市頭漸上夜燈紅

鄆城懷古

寂寞鄆都古驛邊昔年新莽迹流傳勞心恭儉欺豪傑逞臆更  
張誤簡編指點城闔沈棘楚偶談金石重刀泉倉皇兵沸漸臺  
畔果否眞王命在天

滹沱河懷古

炎漢中興記戰征河源銅馬舊知名兵纏宇宙英才出身蹈艱  
危帝業成澤腹堅冰仍凍合村頭大樹幾枯榮雲臺諸宿空干  
古惟聽流澌激岸聲

樂城晚發

鞅掌馳驅類轉蓬膏騰夢破寺樓鐘遙知萬井煙橫處布被繩  
牀睡正濃

軍營凱旋路出正定府過隆興寺瞻禮曼殊大佛法像  
快覩金容滿月圓琳宮頂禮信天緣白毫光照輝三界寶珞聲  
搖徧大千仰面方瞻螺髻聳低眉恰與法雲連歸人無恙兵戈  
際持護深蒙我佛憐

曉過阜城驛

跨鞵結束漸凌兢冉冉孤墟暮色澹古道問郵催換馬茅檐飯

客聽呼鐙前旌細數過來否殿後煩詢到未曾不信長安如日  
近馳驅終覺愧行勝

夜過新樂店

歷碌勞薪肯暫畱輕裘短劍急歸休村雞三唱月沈樹畫角一  
聲霜滿樓野氣漸看沈馬埒寒威直欲逼貂裘如雲戈馬燕南  
道夢裏鄉關識路不

方順橋

十二郵亭次第更雲深宮闕望神京雙騶送客路偏遠一犬吠  
村人乍行古驛重經疑是夢好山迎面不知名歸途喜覩豐盈  
象麥隴高低見耦耕

軍營凱旋蒙

恩賞戴花翎恭紀

幕府才慚借箸難

天威震懾翦凶殘愧無勲業圖麟閣特拜

恩綸戴鵷冠三世弓裘難負荷一家鐙火話團欒思量歸去差  
堪慰博得萱堂色笑歡

過保定

鐃唱聲中歷保陽望塵冠蓋揖車旁軍中事實諮詢細使館壺  
漿應接忙午夜暫欣休騎從辰征愁復攬衣裳心懸魏闕瞻  
雲切遑問郵筒路短長

敬題先大人自作牧笛圖遺迹

彷彿江村二月中柳隄煙暖碧黏空兒童也荷安閒福牛背斜  
陽一笛風

遺墨殘縑手澤傳披圖展觸轉淒然卅年江海求芻牧未得歸

耕二頃田

重陽游翠微山用壁間韻

峯迴斜抱閣泉響到門聞竹潤非關雨松高不礙雲游魚閒聽講老鸛靜呼羣偶值安禪侶扶筇話夕曛龍泉庵

琴筑階前落泠泠枕畔聞佛鐙澄夜氣詩夢入秋雲暫寄煙霞窟居然鸞鶴羣呼童裝襪被歸路趁朝曛夜宿禪室

山深游屐少寺古絕聲聞僧飯燒黃葉樵歸話白雲潭空龍呪雨林暝鳥呼羣不見盧公久陰崖悶暮曛祕魔巖

秋思來天半疏鐘上界聞林枯藤作葉峯遠樹疑雲飛瀑沈虹影高風起雁羣忽看紅一綫幽澗靄餘曛慧絲寺

塔上一鈴語因風隔澗聞丹崖斜漏日碧簷暗生雲殿靜鳴魚板臺空想鳳羣基係明郡主行殿升沈何處問衰草沒殘曛靈光寺止

抱冲齋詩集卷七

長白 斌良 笠耕

齊魯按部集一

十月朔奉

特命馳赴山左隨同章相國

照查辦事件出都感賦

秉節乘輶指大東  
鞭絲帽影太恂恂  
千盤瘦轍分殘照  
萬樹枯楊戰朔風  
驛路平安烽火靖  
鳳城蔥鬱瑞煙籠  
青齊民物今何似  
想見單椒秀色同

宿良鄉有憶

耳畔猶聞笑語盈  
出門頓覺景淒清  
荒雞古驛孤衾夢  
涼雨虛窗落葉聲  
他日來歸春水滿  
所思不見暮雲橫  
遙知此夕燈前話  
早計燕南第一程



過宏恩寺

我識門前雙刹竿，喫茶曾記坐蒲團。  
林飛霜葉烏巢露，牆羃征塵翠薛乾。  
戀影倏過蕭寺遠，鐘聲高出石樓寒。  
問余何事頻來往，古佛無言帶笑看。

題南溝店

冷煙疏柳集昏鴉，新月痕纖屋角斜。  
溝水東西轍南北，出門容易感天涯。

高橋逢野雲朱八時將有西江之行

翰墨緣慳會面遲，枉從人海結心知。  
那期風雪燕山道，卻值江南老畫師。

握手今番意境殊，茅檐促膝一燈孤。  
好將尺幅驚溪絹，爲作寒村旅話圖。

莫憚西江水驛長片帆風送下南昌小山秋色平分到寄謝中

丞代報章

八月間芸臺先生遠惠盆桂

嶺頭梅信欲衝寒到及香疏雪意殘倩折南枝君記取寄來當作畫屏看

### 高橋題壁

煙外風帆望有無長隄縈帶水迴紆燕南風土江南景疏柳平橋看賣魚

### 趙北口寫望

結納休誇趙勝雄平原寂寞酒樓空危橋數與連城並高唱聲猶擊筑同水落煙痕浮鷺嶼天寒風色上漁篷布帆遠帶斜陽渺無限鄉心寄望中

### 有憶

不聽琴聲忽一年綠窗雲暗月難圓  
欲營齋奠空紛若獨荷恩榮更惘然  
此去行將隨馬走傷心猶未卜牛眠  
伶俜兒女牽衣別翻囑旁人好愛憐

漫河道中

凍泥摧轂響鏗鏘款段行來路更長  
千里離情迷草色幾家生趣住波光  
寒蘆夾岸吹涼雪殘柳當門縮夕陽  
珍重添衣游子意莫教孤負倚閭望

望景州塔

驚看玉柱凌空矗突兀孤撐北戒天  
實地自堪千載立高名豈藉萬人傳  
修成阿育誇生佛題向慈恩感少年  
我欲褰裳登絕頂一聲長嘯破蒼煙

寄諸弟

獨騎瘦馬踏層冰羣季相從惜未能  
弈罷童還尋落子談深客  
爲翦殘鐙身閒羨爾無羈馬宦薄慚  
予有髮僧未識聯吟晴雪  
後梅花影裏憶吾曾

劉智廟與吳澗蓴夜話用前韻

三椽茅屋冷於冰小坐寒侵睡未能  
櫪健羸爭嚙莖破窗飢  
鼠暗窺鐙談深每藉同心友氣靜如  
來說法僧昏黑蒙茸催整  
轡橋霜店月見何曾

沿河曉行復用前韻

笨車輾輾蹶輕冰高臥黎牀亦未能  
蘆港白凝晴夜雪草橋紅  
透隔溪鐙漸帷宛似孤舟客託鉢居  
然野寺僧爲語清流休笑  
我揚旌打鼓昔游曾

審高道中有感三用前韻

頭銜未署一條冰坐擁皋比歎未能古驛荒寒沈漏鼓深林明滅閃窗鐙經由不似採風使况味居然行腳僧旭日影涵東岱碧盪胸雲海憶吾曾

過平原

當世甯真不已知無端千載寄相思爲憐公子風流甚買盡青齊五色絲

追悼鄭姬晚香

海棠吹折一枝紅細雨唳烏最惱公性慧那堪驚夢短病多端的爲愁工綺衾擁處香猶在花樣描來譜未終錦瑟年華隨逝水小星光黯月明中

阿爹終歲守遙烽叔豔黃金忍換儂誤信螟蛉堪負子強教鸚鵡別移蹤門前烏臼空能記別後荊花不再逢絮語分明猶在

耳鏡匳淒斷小眉峯

琴摧回憶落花前

先室於三月間逝世

縞素妝成泣暮煙怕我殷憂頻慰

藉爲兒嬌小倍鍾憐香薰綺閣春常好雲鎖瑤階月未圓應是

兜羅無侍者喚回相伴藥珠天

雨榭鐙窗總繫思十年相倚忽差池柔情旬綫將離候丰致蹁  
躚乍見時孤鳳已辭連理樹小梅偏愛側生枝無端彩燕雙飛  
去贏得潘郎鬢早絲

又自慰

奉倩神傷劇可憐那期紫玉又成煙花寒半是因春瘦星小原  
堪比月圓蕉葉心抽常宛轉楊枝夢斷總纏綿閒愁我亦無由  
遣漫說多情損少年

抵濟南

虎節親持下玉京殷勤僚友感郊迎看旆影紅當馬依舊山  
光綠進城遠道風塵頻慰問齊州民物重關情今來形貌嗟非  
昔故吏還能說姓名

陳立凡中丞

預

招飲吟碧山房感賦

猶記垂髫過此堂廿年回首益旁皇知交握手都如夢舊迹關  
心半未忘照影忽驚青鬢改侵衣仍覺綠雲涼低徊驀下潸然  
淚

御墨旁書字一行

堂懸

賜額旁題

先嚴諱

偕吳澗尊孝廉話舊

相伴風塵鶴髮翁促談儼似繭同功貪看秀澤嶙峋碧拋卻茗  
溪躑躅紅名士自宜居厯下野人偏愛語齊東桃花漲滿煙江  
暖準備巾箱返釣篷

卽事偶成

左藏金錢散莫完補苴后漏力空殫旁觀每歎研心少當局方  
知著手難磐石轉移須並舉勢絲晰理貴尋端蟻穿蠶食伊誰  
咎冰結原非一日寒

夜不寐

倚枕不成寐回腸似轉輪摸稜心未忍面壁性難馴月印書窗  
曉風傳漏鼓真煙波迷客夢何處著絲綸

十月二十二日濟南夜雪回憶去年隨同知亭相國

津

在開州軍營勦捕頻年跋涉勞逸不同感成斯作

去年今日賦長征結束囊韉馬上行刀掩紅燈催草檄雪埋玉  
帳急提兵平吳鵝鴨宵潛渡滅滑熊羆晝斫營此夕牙籌勤計  
畫冰花生硯夜窗晴



卽事

珠算牙籌鎖日忙  
片時行館得相羊  
名箋每愛書虛白  
杭州虛白齋紙  
最古帖何從覓  
硬黃寒暖可徵浮  
世理安恬卽是養  
心方  
去年此日澶淵道  
盾鼻磨殘檄數行

贈吳澗蓀

小住春明獨客愁  
又從客裏賦閒游  
偶尋廢紙糊窗眼  
時疊殘書作枕頭  
青簪夢衝江上雨  
紅鐙詩記酒家樓  
疲驢破帽還依舊  
歧路何人識馬周

晚起

殘夢依稀尙耐思  
當關無客起偏遲  
鑪香入幔聞方覺  
樹影移窗悄不知  
脫口詩成如舊作  
稱身衣好勝新時  
今朝寒甚憑何禦  
從事青州速致詞

弄筆

棘闥深鎖靜無譁  
檢點閒中景趣賒  
青李囊盛臨晉帖  
湘梅盆貯試唐花  
墨濃膠筆微添水  
火活圍鑪趁煮茶  
結習每耽儒素味  
金貂漫作長官誇

嵩亭弟榷稅八溝得書卻寄

封面標題墨色新  
開緘翻怪手逡巡揭來宦轍風塵遠  
說到家常骨月真  
草長池塘疑是夢  
雁迷關塞不知春  
逍遙堂畔聽風雨  
千里情懷兩地人

策騎東來此暫停  
說將近狀與君聽  
迎門曹掾皆生客  
到眼湖山總昔經  
今日應官閒聽鼓  
當年學禮憶趨庭  
傷心父老街頭話  
遺愛追思尚涕零

與澗尊夜話

天涯兄弟感離羣  
客舍相依賴有君  
一穗紅燈涼似水  
滿窗寒月白於雲  
詩情高妙來天半  
旅話纏綿到夜分  
卻憶去年偕季子  
安排書劍學從軍

上年與令弟夢庵從事軍營

不寐

門外聲傳漏鼓三  
寒森夜氣逼燈龕  
羅幃對掩雙飛蝶  
絮被高眠獨繭蠶  
未免有情思縷縷  
可能無夢睡沈沈  
酣侵晨漫謝當關客  
叔夜書中戒不堪

冬夜偶成

檢書看劍總無聊  
鬢雪愁侵暖未消  
人坐虛堂思莽莽  
風吹廣廈韻蕭蕭  
檠燈寒重光仍斂  
鑪炭紅深影不焦  
靜夜聞雞眠不得  
欲焚筆硯學君苗

新月

一彎纖影出雲寒爲似眉痕著意看願得相思如此月再遲旬  
日卽團樂

冬夜有感

欲求真力難任竊祿無功負

主恩千載置身慚往哲十年爲政守初心破窗紙飈知風入傳  
舍燈昏覺夜深滿目陰森寒特甚一陽何日復來臨

鳳翥石

萬古玲瓏碧遙分泰嶽秋迴翔得奇勢孤立在中流春雨苔痕  
活斜陽瘦影畱爲防飛去急面面石闌周

陪慶恬庵方伯陳鶴樵

國仁

廉訪公讌

公讌聯三雅朋簪萃七賢暫容寬禮數因得憩林泉煖意華堂  
聚冬心古木傳海棠雙玉立預想照春妍

指點前途好衙齋位置幽林陰銜夕照橋影界中流官雅常隨  
鶴情閒憶狎鷗遙詢草堂畔松桂誚吾不

自吟

未成家數不求知抹月批風任意之韻語偶工非是學性情流  
露半成詩春深好鳥鳴幽谷夜靜寒蛩出短籬翦綵每嫌隋苑  
樹生香何處覓花枝

六言

記得髫年過此市廛猶認依稀今日重來若夢人民風物都非  
柳抱明湖水曲煙籠佛峪鐘圓試問皇華星使風光可似當年  
廿載甘棠遺愛至今父老猶思偶聽街頭歎息 玉中丞有此  
兒

趵突泉流直湧鵲華峯影雙高行過七橋南畔離情煙水俱遙

上章桐門相國照

追隨黃閣愧無能百尺龍門獨許登  
路國精神彌鬢鑠曲江風度最端凝  
九邊戎馬將軍帳五夜封章宰相鐙  
顧問頻煩塵睿慮皇華夙夜望觚稜

遣興

輕裝荏苒浹旬留官舍棲遲欲白頭  
行篋有書差免俗客牆無畫轉添幽  
離情共草生芳渚鄉思和雲泥翠樓  
杜宇早窺歸思切故來相喚向春愁

過呂仙祠

身披鶴氅趁公餘飛鳥閒過羽士居  
門對明湖收眾妙亭招涼月寫情虛  
應知句漏還丹久自笑邯鄲入夢初  
到此恍疑游閬苑未知真境果何如

書懷

翰墨誰言夙有緣  
客窗聊復對青氈  
書如飛燕無妨瘦  
詩類枯魚那得鮮  
寒意暗生晴雪後  
歸期難卜早春前  
豬肝空自爲人累  
覽鏡依徊惜壯年

除夕

今夜華堂畔  
應多作賀人  
風塵千里別歲月  
一番新良友頻相  
過家僮亦自親  
鐙花雖爛漫不及故鄉春

重過千佛寺

乾隆六十年

先君禱雨茲山旋霽甘霖

到遺墨如新白頭老衲猶有能談往事者因用坡老宿圓通禪院贈僊公長老韻作二律與山僧更結一緣云

重香火

再到闍黎信有天  
依然滿耳響風泉  
仰觀古殿驚鴻迹  
頓悟空山枯木禪  
一瓣心香常供養  
廿年手澤幸流傳  
他時應作堂三

過見客長言鶴欲仙

報賽曾經雨後天  
樹頭百道挂飛泉  
當年侍禮金蓮座  
此日重參玉版禪  
往事都如殘夢去  
前因偶聽老僧傳  
門前雙檜應相識  
非復翩翩貌似仙

干佛峪

一片飛來石  
誰將法像鐫  
蓮花香自在  
螺髻翠天然  
玉洞慈雲護  
金容滿月圓  
低徊尋古碣  
猶帶六朝煙

曠如堂

岱宗分一脈  
延緣抱高城  
結構凌雲麓  
登臨暢客情  
窗中兩峯碧  
林隙片湖明  
筇竹隨春到  
東風舄下生

龍泉洞

翠斧開山骨  
陰崖閼石泉  
雲寒凝似絮  
蘚古厚於錢  
仙鼠迎風



側神魚吐沫圓曹溪畱一滴汲取證茶禪

依嵐亭

風磴盤螺曲山雲繞屐停低頭全魯小縱目遠天青嵐重侵衣  
袂松圓入畫屏塵襟何處滌物外有孤亭

詠厯山石佛像

面壁虔瞻梵相真恆河沙幻骨嶙峋雲煙香界堅剛性水月祇  
陀自在身蘿帶捫胸瓔珞繞苔紋結頂翠螺新偶然說法天花  
落亂石無言點首頻

早春偕錢質夫德蘭谷韓敬直徐月巖游小滄浪

雅有滄浪興虛亭漱灩中山光半城碧湖氣七橋通柳色回春  
雨荷香認故叢清游足心賞况復五人同

高譙隨雲散叢臺枕郭偏尊壘仍極浦羣屐憶當年身世雙蓮

鬢煙波一釣船  
濠梁有真趣  
魚鳥亦悠然

匯泉寺

垂楊環水寺斷岸小舟停  
客到閒參茗  
漁歸偶聽經  
門畱片雲白窗納一湖  
青欲問菩提意  
泉聲善也冷

泛大明湖

高岸初回轡  
明湖好放船  
蒲芽出春水  
柳色澹新煙  
螺黛涵波動  
漁歌入浦圓  
偶然閒笑語  
沙際警鷗眠

雪後出濟南西路由黃岡作

偶步齊西門  
路出黃岡前  
泥融土膏潤  
靜抑飛沙旋  
馬蹏閑蹠蹠  
得得垂絲鞭  
是時景初霽  
縱目羈愁捐  
岱宗青不了  
如龍游蜿蜒  
高下任縱橫  
遠近相鉤連  
惟有鵲與華  
孤立絕比肩  
崢嶸壓齊魯  
突兀撐遙天  
高寒風色峭  
素積迷峯巔  
皎皎玉華開  
勢

若卓筆然白雲細如帶曲抱山腰圓模糊范寬畫粉墨誰精研  
天公厭分明迹晦神逾全遠景固奇創近村尤清妍茅廬四五  
家涼絮飄屋榜向榮漸消鑠霰滴如旒懸僵立萬楊柳樹杪霏  
溼煙略約架小溪凍活流涓涓撐杖立牆角零落堆白氈團焦  
指墟落曾有幽人眠

過東昌弔明金公

鉉

黏天春草接蒼茫忠定當年此戰場兩日奇功支半壁一腔碧  
血答高皇驚心鐵版沈秋井回首金臺易夕陽曾向叢祠薦寒  
淥遺墟經過感徬徨

濮州行館爲前明王穀原舊第楹間書隆慶年月迄今  
已三百餘年矣其子孫猶能以耕讀世守洵所罕見  
感成此絕

保家深佩子孫賢堂構流傳三百年莫向昌平重回首十三陵  
畔草芊芊

游千佛山恭和

御製原韻

岱宗駛餘脈臨淄毓靈秀屏藩濟城南位置實天就筍輿度嶙  
峴佳景與目邁路轉寺門見紺宇枕巖岫伊誰鑿山骨妙相峭  
壁鏤林壑蒼翠交一片綠雲綳佛座隱龍泉潺湲噴乳竇匏樽  
汲取嘗齒冷不可漱心境頓清涼遐想生密茂俯視齊魯墟塵  
中壤錯繡豈料煙霞區偏使觀覽富山靈鑒幽獨故爲娛清晝  
斜照入圓松瘦影自相副

重登千佛山感賦用邊華泉韻

扶策東風記昔經筍輿重踏翠雲層空中樓閣憑誰構天際闌

千我試凭屐冷苔岑懷謝客茶香禪窟憶山僧坐來漸覺生微障鵲華雙峯翠靄凝

雨中過新莊嶺

近岱爲霖易雲陰膚寸生溼凝嵐翠重煙抹樹梢平馬足愁登坂鳩聲妒放晴甌甕應滿獲喜洽老農情

荊門村

山店通雲霧籃輿溼翠侵人民多老壽林樾悶幽深坂峻宜調馬溪澄看浴禽岱宗瞻咫尺悵惜未登臨

東阿道中晚成

旗亭買棹已昏黃犂确紆迴路倍長野水赴溪聲決決亂山圍月影蒼蒼涼颼拂面收殘暑鞅掌勞人憶故鄉十丈輭紅京國夢池塘何處露荷香

回究

去時初見綠盈疇，卻喜歸來麥有秋。  
愧典三州無所事，烏紗白袷對南樓。

楊家壩

泗漲趨高堰，奔流激有聲。  
銀河天上瀉，金鼓地中鳴。  
一桁晶簾捲，千條雪練橫。  
喜聞津吏報，飛挽漕舟行。

鉅野途次

萬鴉唳徹曉窗明，結束蒙茸速客行。  
城畔旌旗飄曙色，馬前鼓角帶秋聲。  
宣防豈有迴瀾手，撫字空期得眾情。  
穠稔登場梨柿熟，曹南歲尙喜豐盈。

喜吳澗蓴孝廉至

南風吹到孝廉船，倒屣相迎喜欲顛。  
小別半年萍又集，深譚終

夜燭頻然繞牀藥裏憐摩詰投老風塵感仲宣  
膈膊村雞忽爭唱枉教行李息雙肩

南來風景近如何猶憶當年鼓枻過江表  
可曾銷語詠武林今又見時和傷心舊雨存  
亡半極目停雲感慨多且倒甌中綠沈茗  
從來輿論在煙蘿

雨過曹南

涼雨正廉纖霏霏入曉簾蘆根順流折柿  
顙著霜甜眼豁雲將散身寒風忽尖泥融  
沙路滑取次問郵籤

贈阮寄樵少尉

嵇山回首暮雲浮一著青袍十四秋傑士  
不卑居下位高懷能

自立中流開囊檢藥延民命

今秋瘟疫盛行寄樵施藥曹單所活無算

抽筆如刀斫

賊頭

寄樵曾隨熊介茲觀察參佐戎幕剿賊文檄皆出其手

歎息斯人猶未遇愧余奉使

按三州

夜雨曹南西廨寫懷疊坡公韻

空階滴淅瀝寒雨落還已  
梧桐夜打窗夢穩秋聲裏  
短檠暗復挑呼兒折枯葦  
觚棱渺何處相隔一千里  
家言萬金如價貴洛陽紙  
何時歸蒼山坐石看雲起

梧竹半庭滿助雨聲未已  
夜氣來不知秋鐙小窗裏  
梅臈恐襲人層疊藉寒葦  
窓窓整鞶轡距隄六十里  
河流順軌否一騎飛溼紙  
喜聞說安瀾攬衣急爲起

曹南道中再和坡公韻

入秋雨復多連縣勢不已  
村郭隱莫辨冥濛溼煙裏  
疊疊望柿顙蕭蕭響葦葦  
泥融行路難紆迴不計里  
稍喜天容開好雪薄於紙  
飢鳥散田間見人忽飛起



同懷弟法良校刊

男崇福謹校重刊

抱冲齋詩集卷七

長白 斌良 笠耕

齊魯按部集二

春日病起赴任城

幕見西郊萬綠稠  
天青煙暖豁雙眸  
疾瘳猶蓄三年艾  
骨瘦宜披五月裘  
歛鉢風鑪常結伴  
鞭絲帽影故遲留  
此行好讀河渠志  
漫作南池十日游

曹南行館隄後寫望

黃篋新編閣軒窗面大隄  
遠看牛馬走閒傍鷺鷥  
棲河勢稍趨北雲光半在西  
晚涼邀客話茶具正堪攜  
日涉頗成趣高原景物幽  
雲低帆影度葭密雨聲畱  
野蓼紅迷岸垂楊綠半樓  
沁園何處是此亦足清游

長城驛

古驛藏山麓陰森萬木交峯圓雲乍合岸迴漲初消薄宦仍車馬勞生感鬢毛何當脫塵滓巖壑任逍遙

過虹霓澗

壁立雙巖寺蛇盤一徑穿竭來山畔路宛似峽中天茅舍因峯轉雲柯抱谷圓斜陽催驛騎鞭破玉溪煙

暮春偕吳澗蓴

曾貫馮花橋

元熾

諸象齋

雷

冷雲岳

烜

鄭春泉

烜

黃子芳

景沅

家弟燕山可盦子

延福

姪延

禧

元帝廟賞白牡丹

東風吹入梵王家結伴相尋泗水涯案牘喜無春筍束吉祥寺裏共看花

冰雪團成玉剪裁琪花正對小窗開雕闌錦幄纔相稱富貴翻

從澹泊來

閭苑仙葩善託根空王宅裏燦雲崑當年若向朱門種能得相  
看到子孫

講室清幽玉轡停瓊花千朵對山僧閒中一事差堪擬龍女雲  
堂靜聽經

河上

一曲來千里崩騰下禹門天垂疑野盡滄走挾沙渾籌備健莖  
貴謳歌瓠子喧河渠書未讀慚愧守高原

題馬千總像右

老兵知大義落水聽傳聞捍患能捐命迴瀾獨策勳舊功苔碣  
記新楮瓦鑪焚報祀恩何曠忠堪勸一軍

贈黃子芳

塵談霏屑鬪和光書劍頻年客大梁起我無心希紫貝活人有  
術祕青囊點霜鬢髮懷親老潑墨雲山入夢涼數番遲歸非落  
拓會須捧檄慰高堂

曹河大隄寫望

放眼空無際高原攜杖登河趨黃一綫煙暝綠千塍民氣看全  
復巢痕喜漸增寄言芻牧吏兵燹昔年曾

夏夜口占

短夜睡偏晚高朋話倍長坐深嫌席暖雨歇覺鐙涼檐鳥棲初  
定池蛙吠太忙頓生清淨想風墮野蓮香

張夏道中

雞犬煙霞外數家成一村雲寒垂屋角樹古出牆根山色低帘  
影春流亂草痕巾車往來熟投策款柴門

自曹南歸宛城

多衣龍節擁歸韉  
鞭底秋風驛路傳  
平野天垂雲似海  
高原村列樹疑煙  
魚鹽負販剛爲市  
穰稔登場樂有年  
敢說迴瀾憑赤手  
幸蒙神力獲安全

渡汶水

鳴騶暫行邁  
去家百里強  
延緣泗水濱  
越度甯山陽  
維時屆長至  
虜發郊坰荒  
烏白捲朔風  
鳴腳凋嚴霜  
地曠樹影短  
村野天光長  
冰漸膠篠簞  
確沿松岡竭  
來大河口  
瓦亭標路傍  
汀洲浩無垠  
清汶流湯湯  
叩須爲喚渡  
書劍同攜將  
筇輿駕瓜皮  
穩坐疑匡牀  
寒漪徹底澄  
鑑影鬚眉蒼  
沙虛受篙觸  
眼亂如蜂房  
瞥忽登彼岸  
遠縱一輦杭  
回看待渡者  
心急如渴羌  
舟師橫索錢  
捩柁神飛颺  
氣阻負販徒  
羞澀愁穴囊  
凶雖非滅頂  
濟亦須

寒裳將進復趙趙脛畏衝波涼徬徨夕陽岸閱之頓心傷我聞  
鄭子產濟人溱洧行愚蒙頌惠政賢哲小器量云胡更不逮病  
涉羈旅妨芻牧無乃情保赤名何當緬彼上古制冬月成輿梁

天平店飯罷歷辛莊嶺長城驛望岳麓諸山愛其雄秀  
欽崎駭目饜心塵勞鞅掌未暇賞翫得勿爲山靈所  
笑偶作此篇以寄興

雞聲飯香裹蓐食日云晏塵鞅汙山靈媿彼游汗漫峯影紛雜  
沓嵐光時聚散千霄復入淵先事豈能判境界聽所遭四瞻獲  
奇翫路紆香裊篆人登柳魚貫振衣竦天風飛鳥共目斷坡陀  
人家頂瓦屋未及盱俯視平林端雲陰雜炊爨不見黃犢耕微  
聞白鳥喚山田衲衣如零縑誰補竄橫殺方直圓畦疇隨蹊換  
路轉略約橫沙平浩無岸柳老茁煙梯松適偃鐵幹寒酒激奔

湍日濯瓊瑰燦倏焉縋幽谷黯黯失昏旦藤枝刺眼新猗猗  
纓亂處下嗤井蛙升高比天翰幽蔚本穹祕清詞罔難讚因想  
峨眉巔翠檣埽天半蠶叢魚鳧繞赤甲白鹽爛閣道莽通秦棧  
途赤燒漢嶠岑鬼斧鑿湏洞女媧鍛平生五嶽心簾滕勞計算  
如何初入山舉趾意先憚世路多險巇行行發長歎

曉發長城驛

夜行畏栗冽明發候朝暾清光靄樹頭淡暈胭脂痕征人已  
途野店初開門一徑入深窈漸遠墟市喧四山抱涼翠絮帽飄  
雲繁錚鏦漱寒玉古澗陰泉翻狐裘披蒙茸不若挾纈溫車鐸  
凍不語僕從僵無言風色甚荒峭霧掩林扉昏文書聊引睡夢  
繞梅花村

過峒山



紅牆隱天際，隱約見寺榜。蔚然蒼翠深，忽墮疏鐘響。警人如棒喝，羈懷頓開朗。徒倚碧雲岑，攬轡暫延賞。辭磴一千尺，陡絕干霄上。不知行腳僧，著破屐幾兩。登臨轉遐矚，縛束若塵鞅。茶香結靜緣，方外交亦廣。回首翠微間，題詩記疇曩。月印碧潭松雨落，幽蹊橡別來小刹，那清游勞夢想。

張夏頻年山水漲，發積潦盈途。行旅病之僧，悟先募金作橋。往來稱便，余偶憩道旁草庵，聞述悟先披薙顛末，感成此什。

雨多山漲驟，谿坳積橫潦。征人厭苦之，野僧發願好。醵金以成橋，瓦鉢沿門討。擲將青竹枝，化作白石縞。低或排雁齒，華不刻魚藻。虹光落澗盤，收束奔流瀨。竭來駐征羣，茗椀開懷抱。聞人說山僧，綺歲失翁早。長爲南衙吏，是非詭顛倒。篋中筆如刀，中

人等刈草自悔恐噬臍民恨欲鹽腦豺虎具善根遲暮期自保  
遁世入緇流宿惡風鐸埽閒檢破裊中尙賸爰書稿幸免析楊  
侵甘傍龕鐙老我聞象教大志在拔煩惱屠刀一以放平地躋  
三寶此衲力洗心安閒登壽考告汝門外漢因緣須自造古佛  
欲有言福莫從余禱

開山曉發

嶽麓行三朝髻髻遠迴互陂陀閒犖确延緣不知路侵晨已出  
坎僕御騁馳驚平楚莽無垠厥壤黃金布參差簇塵舍微茫點  
煙樹層構不受蒙檐牙猶半露牧馬垞在野亂散如白鷺天光  
淨於水凝視幾欲誤欲寫寒旅圖巾箱乏絹素稅駕今何所笑  
指華不注

抵濟南有懷吳澗尊孝廉

單椒又見翠煙凝行役空嗟此歲仍人比搏沙欣忽聚事如吹  
網過無徵問梅官閣頻呼酒踏雪春城未試鐙者番旅窗添寂  
寞衝霜歸去舊吟朋

自齊河至焦家廟

蹤迹類萍梗行止隨風鷗歷下思勞薪駕言齊東游馬瘡僕痛  
矣暑短路阻修千盤瘦轍繞一綫斜陽畱古道寂無語時聞鳥  
啾啾周折入幽谷廟壩當路頭蕭條屋三椽蒼蘚壞壁浮窗眼  
紙痕破野風鳴颼颼年深瓦松長翠影和煙流門前白楊樹枝  
走如龍虬皮皴腹空洞十圍堪蔽牛荒寒景物峭過眼添羈愁  
以姓名厥村錫名良有由試問邨中人孝然誰匹儔

過大明湖有懷錢質夫農部

城闌緩控玉驄驕風帽衝寒度七橋山色堆藍昏似睡湖光潑

雪凍難消茶香鵲舍疏吟侶荷盡魚天冷畫橈遙憶觚棱錢版  
使鞦黏霜影正趨朝

冬夜

霜氣一天凝宵深語鑿冰峭寒欺絮帽皎月暗窗鐙可是忘情  
客居然有髮僧靜來還自省慚媿百無能

寄書

慷慨披肝膽平安付驛筒心危憂患裏才老別離中硯滴研初  
黑鐙花翦更紅不知千里外相憶幾人同

游大明湖

小舫衝波聽有聲披裘結侶占幽清湖光北去都無地山色南  
來半入城柳帶彎跼詩意味蓮涇冷靜佛心情馬頭紅謝旌旗  
影鳧雁雙雙爲送迎

冬日偕諸象齋冷雲岳泛大明湖至滄浪雜詠

簿書堆裏掣身難招集吟朋訪釣竿影入冰壺堪濯魄吾儕性  
本耐清寒

蘆漪松隲路迂斜指點僧家與釣家蕭瑟誰摹崔白畫襍褻寒  
鷺立枯楂

匯泉小寺隱垂楊畫舸填門熱道場趁得殘僧閒洗鉢齋糧分  
供老魚王

石橋轉記路東頭修禊湔裙憶舊游扇影招香人似玉好春偏  
在會波樓

北渚遺蹤杳莫尋草堂寂寞枕城陰茶禪詩夢笙歌會寫出游  
人淡蕩心

水楊無葉亦婆娑野客頻來釣石磨波漾忽迷臺榭影門前應

是酒船過

鬢髻參差壓女牆  
淩雲紺宇點微茫  
驀看紫翠中峯湧  
不辨嵐光與佛光

猶憶髫年侍讌游  
剎那頃歷廿春秋  
牆陰苔碣偏增感  
手澤摩挲半晌留

兵傳靖難贖空談  
砌薛渾疑碧血含  
忠定魂棲應有恨  
飛來燕子傍鐙龕

雕梁界破碧潺湲  
四照亭虛敞不關  
詩意遠隨雙目斷  
粉牆低處露青山

菱芡荻蒲到處栽  
田塍幾稜傍湖開  
辛勤最是魚蠻子  
身著皮褌踏藕來

漫愁魚鑰鎖深更  
卻喜煙波半在城  
闌闌萬家叢樹掩  
直教嵐

翠接波明

風廊宛轉上虛亭湖氣山光一派青  
好偕大癡歌鐵笛夜闌吹與自家聽

歸鞭搖曳暮煙中綺散餘霞映水紅  
眠柳敲斜多懶態似舒倦眼盼東風

黃山店

靜對山無語晶窗隔暮寒亭摧餘廢礎  
橋斷失雕欄帽影當風側車聲與石盤  
征途冒霜冷馬踏草痕乾

入山

山行望煙巒端居揖朝貴面目似相識  
問名莫能對

晚抵張夏

寒尤似豹吠深更亭埃昏黃路一程  
墨蘸亂峯千點黑鏡裁新

魄半規明行看衣綫思猶切宿傍松雲夢亦清童僕不須心有  
戒奚囊畱得瘦詩盛

入峽

險勝猩猩爭一門春回幽谷氣溫暄天畱一綫青光靄地裂千  
尋白霧昏人語在巔疑落井車來對面漫還轅康莊平步猶嫌  
窄豈信人閒路蹇屯

長城嶺

行役今年一倍添雲飛馬首笑東還民驕贖每千言判官苦身  
無十日閒難寫勞蹤看敝褐未忘幽興眷寒山故園正賞燕南  
雪燐鹿炮羔壯酒顏

感懷

主恩未報恥歸耕爲政焉能協眾情才本鉛刀磨益鈍心如石



鏡拭難明聲名漫擬徂徠峻官況期同汶濟清寄語保家諸子弟好騎款段守柴荆

抵長城鋪

溪逕逶迤到店遲人隨寒鵲覓棲枝半簾日上茶煙外一甌風香餅熟時鞅掌風塵才易老尋常山水句難奇籃輿安坐身偏倦靜裏辛勤祇自知

冬夜感成

上清符籙體高瀉貪餽丹鑑昧葆真懸榻齋頭卑牧已藏刀腹裏笑傷人鑄來頑鐵都成錯論到金錢便有神滿眼鐙花空爛漫託根無地那禁春

途中見泉源偶題

八十名泉到處留柳根環碧沸風漚果然利濟須涓滴江海何

曾擇細流

過東巷

甌笠整騾綱鈴聲曳夢長山痕三里霧日色一林霜牆缺籬添障途寬柳界行路過東巷好舉步盡康莊

長城道中

歷盡寒山意半消驚沙刮面太無聊枯楊亂架成茆屋廢碣橫塘作石橋零落唐詩隨手閱清醕魯酒帶愁澆年時走馬金鰲背孔雀搖風待早朝

過辛莊嶺

嶺在泰山腳下

礪石牆低蔓草生每於幽巷歷崢嶸馬蹏亂踏寒雲軟雅翅斜翻夕照明蓬閣蒼茫迷海嶠岱宗雄拔拱神京望風人賀登崇峻翹首知居最下程

路旁見策驢者戲成

灞橋風雪渺前塵  
柳老雅寒意趣真  
笑指空林穿瘦蹇  
背閒著得幾詩人

山村

山近民多壽  
時和物自春  
日高谿凍活  
霜釋草痕伸  
潦倒羈情倦  
荒寒畫意真  
老農饒野福  
生未別鄉鄰

辛莊嶺

風俗擬羲皇  
居民半壽康  
柴荆惟鳥雀  
山影亂牛羊  
灌木枝垂屋  
紅藤蔓引牆  
數家安穩住  
豈合號辛莊

重渡汶水

買棹臨流記  
昨經垂楊無恙  
冒長亭波環汀  
漱寒凝碧岸  
隔峯嵐遠送青  
老馬心雄思奮  
足閒鷗意淡  
欲忘形七分  
沙磧三分

水汶上舟宜月夜停

落星石

星隕傳麟史金精化石強照人猶礪石入夜轉光芒并絡分齊  
野銀河渺上方何年復飛去傳語太荒唐

卯莊書事

野風無迹響颼颼吹得高情散莫收道遠驂驪看步驟汀荒鳬  
雁任沈浮雲飛別岫山疑動水過前谿沙自畱芻牧辛勞民庶  
悅野人林下聽鳴騶

喜抵甯陽

刺眼徂徠翠影層應官別郡思曹騰忘年朋舊經旬聚行篋詩  
章一倍增鞭底殘紅催落照馬頭晴綠破輕冰明朝歸博望聞  
笑兒女團圞話夜鐙

足凍戲題

頻年奔走太無因，雙足蹣跚凍皸皸。  
狂飲卻宜供輭腳，鬪便甘讓步前塵。  
坐禪香窟同居士，匿笑齊帷到婦人。  
安得門生來昇嶺，北窗高臥任天真。

奉

命以未諳河務，改發江南，別諸同人。

頭銜不換似新除，學昧河渠太史書。  
長謝黃河千里曲，重尋金粉六朝餘。  
改官難得因微過，爲政殊慚協令譽。  
敢說蒼生能保障，桑榆收取未全疏。

西齋晏坐

頻年馬足走駸駸，纔向西齋坐夕陰。  
晏處偶然思過失，名場何事判升沈。  
戰空樹響知風勁，照晚窗明想雪深。  
薄俗從他秦視

越無絃自愛壁間琴

同懷弟法良校刊

男崇福謹校重刊

抱冲齋詩集卷七

長白 斌良 笠耕

齊魯按部集三

丁丑新正至濟甯

獻歲初番整轡羣任城又去作盤桓賢勞漫說因王事奔走難  
禁笑熱官連日東風蘇小草薄雲天氣釀輕寒杏花春雨江南  
好到及紅香正壓闌

歸兗城

孤塔雲光礙南樓木杪橫言歸新望眼臨別見交情冰泮樹添  
影風騎旆有聲和春回魯甸柳色漸依城

冬仲嗟行役應官亦太忙雲含初日淡風挾亂沙黃冰合魚苗  
蟄寒森馬骨強睫邊橫塔影古縣入滋陽



將游白下春日赴濟南道中作

掠燕風輕不動塵晴光薰染草痕勻將游白下詩增麗纔近清明柳半新宦迹從來無定轍名場暫許作閒人琴書一舸移家去滿路紅香賞殿春

開山道中

好雨春偏少風沙眯目昏白知雲抱寺青訝柳藏村車過泥留迹溪乾蘚認痕濟東秋有穫款客足雞豚

張夏

古驛迢迢度單車軋軋聞斷崖橋補罅深塢樹畱暉待弱碧隨水松喬涼入雲岱宗青未了孤店與平分

張夏道中用樊榭老人韻

春盎和光缸面濃輕裘乍喜卸蒙茸暄寒恰適清明候變滅難

暮紫翠峯簪紱人饒濠濮想雲霄鴻戀雪泥蹤昏黃店月荒雞  
夢一別青齊怕再逢

張夏道中曉行

古驛頻經路盡諳蒼穹似蓋亂峯含青帘挂處日初上紅杏開  
殘春半酣回首龜鳧懷魯望偶思鱸膾入江南明朝攬轡須登  
岱玉檢金泥待細探

往平道中曉發和樊榭老人春寒韻

重裘著體寒如冰峭寒潑水相侵陵飛塵雪白衣上凝漏鼓響  
促朝曦升蒙茸結束嬾不勝客歲于役今年仍岑寂頗類罷講  
僧半臂誰送柿蒂綾萱堂奉爵歎未能上元空憶紅燒鐙征輪  
安得角有稜積垢滿面殊可憎行將買櫓游花塍絳桃殷透春  
雲蒸

東阿道中

零落官橋柳未陰清波如鏡寫愁心  
買漿棚下消煩吻三載風光歎重尋

古邑東阿識未曾斷崖髡柳綠鬚髻濁流河上今逾甚買盡名膠止未能

豪氣年來已半磨臨風長嘯發高歌  
斧柯不在先生手空望龜山喚奈何

長虹新鑿石粼粼樂善優婆發願眞  
題柱偶偕獅子語橋頭曾過幾閒人

輪蹄消盡早春天蹤迹渾如蟻磨旋  
身繫青齊心白下移家預買牡丹船

東阿道中用樊榭老人舊韻

野水滌洄曲抱環鞭絲靜帶晚雲閒夕陽何處添詩思青壓林梢數笏山

蕭然四堵轉如環小駐征鞵一夜閒殘月蘆簾孤店宿竹梧舊逕夢家山

旗亭麗句唱刀環鈴鐸輕搖旅思閒一幃寒郊蕭瑟景玉堂官畫郭熙山

風林斜月挂轡環雲臥松碕夢亦閒過眼煙雲看不了蕭齋辜負畫中山

不聽因風戛珮環輭紅奔走幾經閒濃雲遮眼昏如翳古驛荒城鎖亂山

絲韁鎮日控金環翻爲馳驅暫得閒門外時喧車似水案頭幸少牘如山

誰將杯底印連環  
鸚鵡呼茶畫閣閒  
寒夜無人添半臂  
玉樓粟起聳肩山

臺榭參差碧玉環  
萬松孤月伴僧閒  
平生雅有煙霞癖  
準擬春深訪攝山

應官身似絆縈環  
安得青鞋占斷閒  
佳士座中多逸興  
草窗風雨說名山

從來勞逸有循環  
佩解金魚便得閒  
聽說姑蘇城畔路  
空江漁火照寒山

橋洞銜波似半環  
絕無舟過更幽閒  
驀看紅燄殷天發  
野燒隨風過別山

平生恩不望銜環  
壘塊澆胸意氣閒  
名宦幾人能退隱  
俸錢何必買青山

詩思輕圓妙比環讀書恨少十年間偶然拈得生新句不學香山肖半山

過東阿夜行山中作

兜羅縣裏嬾不勝寒飆暗吹衣有棱馬蹏亂踏幽谷應犬聲乍  
吠山月升一規墨暈張雨蓋數枝紅飈搖風鐙煮茗圍坐二客  
話

謂蘊齋花  
橋二先生筇與夜度峯峻嶒

過辛家驛

新柳碧於染陂塘膩漲生酒帘經雨淡漁網撒波輕遠岫春煙  
白晴村夕照明筇輿穿積靄隨意小詩成

汶上

地號中都舊湯湯古汶喧仲弓祠漸圯千乘國常尊餅熟成晨  
市茶香過半村殘碑荆蔓絡讀罷默無言

輓胡梁園枚比部

良友忽云沒驚聞涕泗傾尺書如昨日杯酒憶平生  
篤實醅儒粹詞華哲匠名爲郎頭白早一宦竟無成  
藐矣孤何託悲哉母早衰身雖捐館舍目不瞑泉臺  
旅匱憑誰舁銘旌幾日回寄言諸舊雨厚賻漫空哀

春日出兗州南門有感

蕭寺尋春興已闌蒙茸結束整征鞍桃花小徑烘晴日  
楊柳深村鎖嫩寒塔迴渾疑城未隔地寬恰趁馬初盤  
澶淵磨盾當年事髀肉重生誤宴安

陰平勘苗行

良時重行役爲念哀鴻急悱惻詢輿情苗荒果何極  
路逢四五人林閒環隱泣扶杖行蹢躅面目黧且黑  
問民緣何飢問民何

所苦長吏勘蠲來赴愬莫罪汝小民欲有言哽咽語莫吐年時  
秋雨多水積微湖漲入夜堰隄決濱湖室飄蕩平地水深六尺  
餘比屋盡讓魚鼈居倉皇家具攜不得身上僅賸袴與襦提攜  
老幼相追逐無家夜向河干宿水邊秋早氣候涼八月寒風砭  
肌骨雨淋日炙難棲止旋斫垂楊縛作屋不聞鄰家雞犬聲但  
聞索食嘯飢兒女哭又聞糧艘轉漕人喧闐萬篙觸浪鳴濺濺  
爾際呼號天莫救韓莊牖上奔流吼老者瘐亡壯散走覓食無  
方空束手商量無計喚奈何曳絳長隄暫餬口朔風凜冽河身  
凍路少行船民乏空沿門乞食一飽難活到春來真似夢窮搜  
豆餅搗作糜未入飢腸咽先痛豆糜食盡復何賴樹皮生剝鱸  
粥代私心恨樹不如菜一剝無餘食不再長官如肯賑民飢恩  
比邱山當永戴我聞小民語迅亟問縣官縣官拂衣起含笑盡



所言鄙邑風俗偷黎庶刁且頑望澤如望蜀虎視兼狼貪慾壑  
 總難飽乞賑徒紛繁去年收成六七分如山鐵案存官文豈有  
 牧不恤民困職司所係憑誰云必不得已出借穀籽種充盈償  
 亦速民登衽席轉移間賑卹難酬奢願欲我聞其言信且疑博  
 採眾論審察之父老囁嚅有深意欲說恐遭縣官忌口吃情詳  
 述莫明匍匐泥塗手椎地爲言去歲秋潦荒縣官火急追下忙  
 興卓持牒如驅羊大戶麥收饒蓋藏次貧迫促中心慌典衣賣  
 犢完官糧可憐散佃淚暗墮比戶逋逃忍飢餓幸免追呼筵楚  
 悲此時翻覺無田樂真情惟有土人知有業無田情本各並言  
 縣官借穀之議起窮庶攢眉吏胥喜速官放穀潤私囊縱不多  
 錢亦餘米其中百弊胡不有出以小斛還大斗暮春出借秋便  
 還轉眼催徵復誰咎然眉暫借策良好剝肉醫瘡終不了地多

莫借貧不能實惠誰沾仍莫保重聞此言長歎息四野飢烏伴  
啾唧速將民隱告中丞直達 彤廷休粉飾山東芻牧無乃怠  
強說豐穰志先壞若將分數評舊荒求劍刻舟見何隘借穀之  
議雖可行蠹役弄權還汝賣君不見漢汲黯先詔開倉何果敢  
又不見宋朱子社倉預設防飢疫

聖人宵旰念民瘼有司莫告甯非私邇日湘浦相國所見將毋  
同胞與爲念明且公邳民阻輿嘸飢窮飛章入告 乾清宮  
聖主軫念恩何崇 詔書何啻蠲租庸布散金錢發廩粟丁戶  
何須詳簿錄還恐黎元活未周更煮粥糶贍不足稍緩須臾白  
骨多老弱流亡轉溝壑吁嗟乎同此一窮黎天視無偏陂井疆  
雖云別撫育理難歧傳語充滕嶧鄒諸牧守不必遠法先賢記  
誰某請看議卹松揆首

陰平驛

路出陰平驛寒煙薄樹梢村荒犬聲大沙軟馬蹏驕雲濤瞻崇嶺溪乾薄廢橋栖栖何所託懷古首空搔

南沙河宿

竹檠芋火影清涼結束蒙茸晚住裝夢去不知身是我須知茆屋等金堂

過南沙河

遠水含沙白晴嵐隔樹青融和剛幾日鞅掌已重經草亂侵官道苔荒上驛亭年時秋漲盛橋柱驗枯萍

過嶧山廢寺

壞牆缺處窗櫺露粉榜模糊山雨深泥馬轡殘荆蔓絡苔碑身短野沙沈牧兒探鰕窺檐角行客停驂憩樹陰漫說南能空色

相笑他檀越藉黃金

謁 孟子廟

袞冕宗周尙尊彝歷代頒三遷仍舊里一貫接尼山養氣容楊  
墨崇功並禹顏我今猶傳食轍迹敢追攀

南池

海右高蹤外城隅復此亭危樓橫太白秋水湛空青詩酒才相  
敵縱橫驛共經風林煙幕歷歷鳥當蟬聽

游兗州隆興寺

熊魚齊嗜兼不得熱官邢易窮幽遐侵晨瀟灑解印綬北郭竟  
詣勞馬搗藥韃盡徹吏卒守塞烏前導聲伊啞闔黎荒廢沒荆  
棘壞梁斷柱支撐斜入門大笑幾脫帽侍者誤認毘盧耶瀉熙  
碣立戶左側龜趺半隱凝苔花手磨袖拂辨辭義藻續內典紛

奇葩堂頭星散支應絕野颺亂竄如奔驪舉頭頓覺白眼礙罕  
堵波湧穿煙霞皇隋廣傳阿育法王製此其一耳數等恆河沙  
杵拱欄楯樸不設巒輒漫無纖瑕盤旋螺磴陟雲表暗中屈  
曲驚飛蛇大千世界但俯視腳底側翅翔神鴉天風蕩我訝震  
動靈異素著非矜誇虔心頂禮瞻滿月瑣窗風敲檐牙低眉  
佛祖寂無語燕泥香落汙袈裟檀越官記永福府粉牆字泯誰  
籠紗雨昏畫壁恍如夢諸天影亂鬢雲遮廣長舌在久挂壁正  
法眼暗迷曇華生平賦性太迂誕獨依古寺尋僧茶清時置散  
亦幸事免持手版趨官衙塵中詎受俗眼白甘爲老圃相揄挪  
行將買棹去江左六朝金粉嗤淫哇帛槌茶磨強拋擲賜書萬  
卷堆行車殷勤贈別謝諸子詩膽直欲凌劉叉頻年東郡多所  
獲奚錦瘦句爭俗訝他時再過剎那頃免絲藤蔓垂鬢鄰鐘

乍吼似有悟物外日月徒興嗟

贈諸象齋

三年蓮幕藉匡攜灑落襟懷略畛畦東郭吹竽同隱迹荒園踏菜播新題觀書老眼明如月判牘雄才利似犀畢竟家山風物好幾時歸棹鏡湖西

改官江左諸同人賦詩贈別用原韻謝之

一肩擔負喜纔除無復終朝困簿書瀟灑安禪今恰可優游從學此其餘忍爲袖手觀成敗不媿初心聽毀譽猶是繡衣江左去

主恩未盡放庸疏

竊祿

皇華拜命守齊東竊祿因時少異同橫策固知遵道範賣刀惜

未變滔風眾情難得民何悅物議猶多治豈工一事思量堪慰藉

詔書特許卹哀鴻

辛莊嶺山行仍次前韻

職守全無責已經閒中猶且事征程漫爲屈子憑孤往恐值長沮避耦耕石磨泉流難就下雲攙峯勢漸能平解魚自是饒清福滿耳笙竽遠市城

長城驛感懷仍疊前韻

蕭然書劍喜囊輕行盡山程憶水程買棹紅橋宜載酒停騶繡隴聽催耕層巒傑閣穿林見急溜奔湍到澗平南下秣陵風景別綠楊如薺抱春城

漫興

負郭無田漫退耕  
畏人枯坐一編橫  
志希古井惟思澹  
心異秋杯已盡平  
畫虎願奢休再誤  
雕龍技擅近求名  
如雲冠蓋城西闕  
乳燕鳴鳩好送迎

捷楚畚鍤昧持籌  
慚媿宣防學未優  
百姓其魚今幸免  
九方相馬已無儔  
但憑忠信欽河伯  
豈有經綸動列侯  
奉此簡書江左去  
繭絲保障可能不

焚香省過夜深嚴  
止謗何修意未厭  
雞鶴同羣原不混  
熊魚齊嗜那能兼  
素餐祿食慚甘滑  
似夢功名飽黑甜  
養氣猶須十年讀  
時還次第整芸籤

得馬亡羊亦偶然  
尋常出處豈關天  
重生髀歎英雄老  
肯折腰時富貴全  
與世無求原最忌  
因人成事卻堪憐  
時清主聖還須勵  
敢向西沽理釣船



明湖餞別

湖柳絲長細綰愁舊盟今日證閒鷗官如白傳三年住客作平原十日畱膩漲無聲穿北渚浮雲何處抱南樓停尊寫出河梁感離思殘春載一舟

雨後濟南畱別

祖餞殷勤感俊豪華不回首插雲高孤村夜雨醒牟麥山郭峭寒欺絳桃沙淨無泥不沾屨草香凝綠尙如袍詰朝古驛鳴鞭去何限離情託素毫

將發濟南因雨小住撥悶

劍匣巾箱都結束無端夜雨忽句畱衝泥巷口屐聲接懸霽檐牙簾影收乞米漫爲三日住添衣且作一身謀倚閭恐切萱闈念急寫雲藍付驛郵

偶成

昨日衫宜園客繭侵晨裘著大夫羊  
暄寒瞥眼多翻覆在笥衣  
裳謹慎藏

雨後山行

四山圍繡隴麥秀綠高低雨過土膏潤淵停石岸齊  
折腰穿鼠穴仰面見巢棲行路難如此閒鷗漫息機

題蔣伯生泰頂重獲秦刻石拓本

祖龍一怒六國夷灰燼典籍空軒義姬周佚籀蹟罕觀粵稽篆  
體推秦斯嶧山舊拓典型在大書深刻藏崦嵫始皇帝制伐強  
暴表彰武業銘諸碑職方廣颺示後世臣斯拜首侈陳詞紛紛  
摹勒失真意墨緒遺誚多肥瘠譬如陽虎貌夫子形體畢肖神  
則離徒令嗜古客懸揣善本希世勞嗟咨北平許子發幽秘窮

按廢谷荆榛披珍珉掘起岱宗頂位置祠廡無偏陂金泥石礫  
事封禪全文散失存其疑摩挲蒼蘚數厥字二十八宿還承奇  
祝融峯頭野火發復沈瓦礫埋荒茨蔣生汲古得修綆碣出晉  
井橫苔墀髯奴奔告發狂喜不啻鼎見汾水湄韓陵片石喧遠  
近我雖未覩先聞知維時三月歲丁丑稅駕江左剛歌驪停驂  
揖客入齋閣幕見鴻刻誇欽崎泰安太守述顛末耳食盡實公  
無訾精采煥奕照素壁拭目耽視翔鸞姿石搨二具字有十其  
八完整雙瑕疵碑形橫殺字徑寸畫比象管劣可追聾牙語句  
當意讀曼漻彫羅殘基臣斯去疾昧死請臣臣文複矣間之  
筆勢圓勁玉筋卓意態橫溢金薤垂婀娜頓訝蚪盤谷秀拔不  
數沙畫錐乃知六藝書並重直與真宰相維持揭來展玩眼福  
廣寶貴豈讓願與彝阮氏曾刊北湖本偕茲並重何軒歧低徊

不覺興慨歎貞石悅豫開心脾吾聞古人有述作垂世立教作  
相師湯盤禹鼎久磨滅不寶其器傳其辭陳倉獵碣壁雍列尙  
父雷鬲焦山遺遼父鄭邢昧探討維鱗貫柳多類推評論真偽  
儼聚訟傾軋文士相嘲嗤魚豕辨譌小技耳刻畫金石誠何爲  
曰殘礎廢恣敲擊徒役智慧形神疲胡不精審典謨訓誥義誕  
保東土敷

皇釐

新泰縣

麥隴畫方鄧亂峯圍一城綠肥林有韻漲滿水無聲說虎懷仁  
政鳴蛙辨世情岱宗登未果回首翠雲橫

新泰曉行亂山中時雨初霽風物尤佳輿中拈樊榭老  
人集卽用和丁敬身游梵天講寺韻

攬衣雞鳴先路長促裝早雨歇涼浚微山行霽尤好夏入綠正  
肥日高紅漸小振策陟坡陀馬蹏響林杪谿盡忽逢村佳境出  
意表颯颯天風吹勢欲偃旗纛征人野鶴姿雲中看天矯徂徠  
龜蒙餘峯多名莫考大造亦逆旅悲鴻託泥爪昨晨岱麓經莫  
釐捫翠窅苦爲塵鞅縛未獲窮深眇山靈應見暝再來松石老  
神游等形接奧妙眾莫曉胸次嶽崢嶸俗氛淨如掃活潑道機  
生煙際一聲鳥

自泰安至青駝寺亂石巉巖野谿環市詰曲鎮日如行  
香篆中因就所見輿中遣悶足成五古一章非敢效  
昌黎公南山句也

峯巒窅以深帶水莽瀠互崿岬夾澗槩眾漲匯奔注淪漣積成  
渠寒光鋪皎素清淺纔沒脛瓜皮少沾汴婢隅杳莫尋笑煩設

漁具連鑣踏浪花鳴鞭驚鷗鷺竭來涉潞潏復與坡陀遇犖确  
橫逕窄怪石噫可怖獬豸鬼臉皺螺旋佛髻露縱橫劍戟張礪  
砢星棊布蹢躅鸞鳳翔雄蹲虎豹怒覆或若槃孟仰亦宛鑪炷  
區體別萬殊茂先罔釋註車聲殷如雷輪摧驚寐寤舉止防踣  
顛孰敢騁馳驚連朝晴景媚郵程幸無誤不逢社翁雨早散公  
超霧相將陟危坂歷井捫蘿度魚貫此先登猱升彼追附直教  
後人額屢觸前人屢巖嶮駭精魂一步一回顧恹恹陟雲表舄  
前指孤鶩麥田渺方罫井畫歷堪數蒙茸翠毯鋪綺繡犬牙錯  
村屋僅露頂溟濛擁深樹曖曖墟煙生征鞍聊且駐故園屋三  
椽梧竹含靜趣云胡困行役栖栖走朝暮歸耕尚未晚顧犬才  
見兔旬日薄江淮片帆安穩住

密陽道中

俗吏規模漸破除，壓車還贖一瓿書。  
無聊舊事縈心曲，似例新條睡飯餘。  
戴勝聲中花信晚，活東游處荻芽疏。  
徂徠山色垂青送，伴我殷勤奉板輿。

蒙陰道中

舊傳蒙嶺產春芽，貯月分香俗共誇。  
寄語人閒玉川子，花瓷切莫浪評茶。

蒙陰道中邨店閒瓦盆植小桃妍媚可愛率題一絕

穠桃一穗鵝塵氛，瓦鉢泥香湧絳雲。  
絕似臨邛村店裏，當壚恰值卓文君。

青駝寺

舊迹精藍覓已無，驛牆官畫辨模糊。  
山田野老勤耘麥，石屋邨姬巧織蒲。  
水慣齧沙陂半漱，人常穿徑草全枯。  
秀萼綠徧啁鳴。

未寫入幽風第幾圖

堠莊驛偕黃子芳冷雲岳夜話

明月窺窗破停騶夜息喧酒人三雅共鄉夢亂峯繁宦拙知安  
命心虛悔放言白圭詩句好行篋待重翻

半城

入夢巉巖意尙驚羣峯到此喜皆平雅聲已動車初秣殘月畱  
人宿半城

半城曉發

寒峭綈袍知豐林露氣滋鴉聲窗曙後馬影日高時漫作發棠  
請誰憐出晝遲鳧雲懷舊望思結幾絢絲

偶成

南華一卷手常持宴坐焚香有所思謗議何修惟責已功名原



不在當時世家漫倚折足几博學窮搜無當厄知白吾今甯守  
黑笑譚且斂半枰碁

渡沂水

亂石擁中央羣流匯渺茫寒颿搖浪白沙激接天黃支派江南  
近郊原魯甸長濟川舟楫少倚馬歎汪洋

琅琊王右軍故里

臥虎驚鴻妙絕羣薪傳八法自釵裙籠驚手迹高東晉驃騎頭  
銜署右軍揮塵清談夸雋品珥貂貴胄重人文琅琊難覓親仁  
里越國蘭亭半夕曛

沂州有懷舊游和東坡上巳攜酒出游韻寄懷吳澗蓀

孝廉

寒食輕陰杏釀雨潑壘烏雲溼林鵑颺歌賦罷霽連朝報謝龍

公莫余侮泥香沙輦日烘晴蜂抱花鬚景交午枝頭鵲鳩引圓  
吭似喚征人相爾汝板橋膩漲荻芽肥驛路東風柳絲舞竭來  
沂水追昔游言念良朋心獨苦重過茆屋還依舊梁燕飛來問  
誰主禾中佳士季子吳腹笥深藏神媚嫵論文相約數晨昏席  
帽青衫污塵土觚稜我歎踏輦紅橋李君歸隱魚圃中間聚散  
等絮萍把臂相逢何處所飄流宛似謫仙人服仕媿非初嫁女  
十八年過抹電忙舊事關心爲仰俯春仲計偕過兗郡翦燭衙  
齋通數語恩恩又促公車上夢落清風修竹宇飛騰奏獻三賦  
時我正淮南發津鼓側耳殷雷天上鳴手筆羣推媿燕許莫教  
磨蠍坐命窮此去乘風快無阻春官錄唱到江城餅啖紅綾應  
寄予

郟城

郊子舊封邑景行車軌憑問官求野在傾蓋訂交曾雲物連吳  
會疆原媿薛滕遺蹤畱廟貌卒史護風鐙

紅花埠

不見山花紅躑躅蒼涼古驛負嘉名心馳燕朔餘千里路入淮  
南第一程香陣棗花雙戶掩綠陰桑葉短梯橫馬頭厭聽郎當  
鐸側耳扁舟振柁聲

同懷弟法良校刊

男崇福謹校重刊